


USA KA PAGPAMATUOD DIDTO SA DAGAT

 Sa dili pa nato iduko ang atong mga ulo alang sa pag-ampo, gusto kong mobasa una og pipila ka Pulong sa Dios. Gusto ko sa kanunay nga basahon ang Iyang Pulong; tungod kay mapakyas man ang akong mga pulong, ingon nga ang mga niini iya sa usa ka tawo, apan ang Iyang Pulong dili gayud mapakyas. Ug kamong mga nagasunod sa teksto, ug uban pa, mobasa kita gikan sa Mateo sa ika-14 nga kapitulo, karong gabhiona, og magsugod sa ika-22 nga bersekulo.

Ug sa gilayon gipugos ni Jesus ang iyang mga tinun-an sa pagpasakay sa sakayan, ug pagpauna kanila sa pikas nga baybayon, samtang nagapapauli pa siya sa mga katawohan.

Ug sa napapauli na niya ang katawohan, mitungas siya nga nag-inusara sa bukid aron sa pag-ampo: ug sa . . . miabot ang kagabhion, nag-inusara na lamang siya didto.

Apan ang sakayan didto na sa taliwala sa dagat, nga gihampakhampak sa mga balod: kay sungsungon man ang hangin.

Ug sa ikaupat nga hugna sa gabii si Jesus miadto kanila, nga nagalakaw sa ibabaw sa dagat.

Ug sa hingkit-an siya sa mga tinun-an nga nagalakaw sa ibabaw sa dagat, nangalisang sila, nga nagaingon, Aniyay usa ka abat; ug naniyagit sila sa kahadlok.

Apan dihadiha nagsulti kanila si Jesus, nga nagaingon, Maglipay gayud kamo; ako kini; dili kamo managkahadlok.

² Iduko nato ang atong mga ulo karon alang sa pag-ampo. Samtang nakaduko ang atong mga ulo ug ang atong mga kasingkasing sa atubangan sa Dios, aduna ba'y mga nanginahanglan dinhi sa bilding, karong gabhiona, nga buut n'yong ipahibalo sa Dios, pinaagi sa pagpataas sa inyong mga kamot, ug aron mahinumduman sa pag-ampo? Sud-ongon unta kamo sa Ginoo, og kaloy-an unta kita.

³ Langitnon namong Amahan, nagaduol kami karon sa Imong Presensiya, pinaagi ug sa Ngalan ni Ginoong Jesus. Ingon nga nanghibalo, nga kami dunay mapanalanginong kasiguradohan, nga gisaad Niya kanamo, nga kung kami “mangayo og bisan unsa” sa Iyang Ngalan, nan igahatag Mo kini kanamo. Mao

nga nagapasalamat kaayo kami tungod niini. Ngani dili arang maipahayag og mga pulong ang among gibati mahitungod niini, og sa kasiguradohan nga aduna kami, nga Ikaw nagapaminaw kanamo karon mismo.

⁴ Nakita Mo kini nga mga kamot, Ginoo. Nasayod Ka sa kung unsa ang ilang panginahanglanon. Tungod Ikaw man ang nahibalo-sa-tanan, makagagahum-sa-tanan, walay-kinutoban nga Dios, ug nasayod kami nga nahibaloan Mo ang mga kasingkasing sa mga tawo. Nahibaloan Mo ang among mga hunahuna. Bisan sa kaniadtong wala pa kami gilalang, nahibaloan Mo na ang matag hunahuna nga among hunahunaon, kay Ikaw wala ma'y kinutoban.

⁵ Ug ginaampo namo, Ginoo, niining taknaa, samtang ginakab-ot Ka sa among mga tinguha, pag-dungaw gikan sa Kalangitan, Ginoo, ug dawata ang among mga hangyo paingon sa Imo Mismong kasingkasing, Ginoo, ug tubaga kami sumala sa Imong mga bahandi sa Himaya. Ihatag kanamo ang tinguha sa among kasingkasing, ingon nga nagasalig kami nga kini ang Imong Balaanong kabubut-on. Ug nasayod sab kami nga Imo kining maayo nga kahimuot ang pagtuman sa Imong kabubut-on.

⁶ Hatagi kami og usa ka dakung pagbubo sa Imong Presensiya, karong gabhiona, usab Ginoo. Ayoha ang mga may sakit. Luwasa ang mga nahisalaag, pabangona ang nahimong mga patay tungod sa sala ug mga kalapasan, ug dalha sila ngadto sa usa ka bag-ong Kinabuhi, karong gabhiona. Hinaut nga makita gyud namo si Jesus. Amo kining ginapangamuyo sa Iyang Ngalan. Amen.

⁷ Mahimo na kamong manglingkod. Pasensya na nga wala kita'y igong espasyo para mapasigo ang mga tawo, og aron makalingkod unta ang tanan. Pero, sukad pa niadtong unang gabii, ingon sila nga gikinahanglan na kono nilang balibaran ang daghang mga tawo, busa pasensya na gyud tungod niana. Ug si Igsoong Grant wala pa man gud nakapatukod og usa pa ka lawak, sa pikas, aron nga . . . sa hunahuna ko mora'g ibalhin niya ngadto sa wala ang kini nga dibisyon. Ang bililhon, bililhong igsoon nangutana kanako karon kung himoon ko ba kono kini nga usa ka tinuig nga butang, ang pagbalik nganhi sa Dallas, nganhi sa iyang simbahan. Usa gayud ka maanindot nga pagdapit kana, sa niini nga panahon, sa diha nga paspas kaayong nagasira ang mga pultahan, ug unya ginatinguha pa gyud sa maong igsoon nga pabalikon ako ug himoon unta kini nga usa ka tinuig nga butang, o buluhaton. Mao nga gikalipay ko kana.

⁸ Ngani nagkaaduna ako og higayon sa pagpakig-fellowship kanila kaganinang buntag, kauban sila ni Igsoong Gordon Lindsay ug daghan pa kanila. Si Igsoong Pearry Green, nga

mao'y moabaga sa umaabot nga panagtigum didto sa Beaumont, nagalingkod siya dinhi sa may luyo nako karong gabhiona. Ug daghan pa, sa atong mga higala, si Igsoong Don usab ug ang iyang asawa. Malipayon gayud kita nga makauban sila dinhi. Panalanginan sila sa Ginoo.

⁹ Karon, niining gabhiona, basta . . . ginapaningkamotan ko gayud nga himoong ingon ka yano ang akong mga Mensahe kutob sa mahimo ko, aron nga bisan ang usa ka bata makasabot pud sa mga niini.

¹⁰ Ugma sa hapon diay may usa ka pang-ebanghelyo nga buluhaton, ug unta makatambong kamong tanan.

¹¹ Pero kung aduna kamo'y mga buluhaton sa kaugalingon n'yong iglesia, bueno, kamo—angay lang nga didto kamo sa kung asa ang inyong—kung asa man igapahigayon ang inyong panerbisyo. Tungod dili man pud namo gusto nga may si kinsa man ang mobiya sa kaugalingon nilang simbahan, aron . . . Ug dayon kung nagmasakiton kamo ug gusto n'yong motambong aron maiampo, ug kon ang inyong simbahan usab adunay ipahigayon nga buluhaton ugma sa hapon, nan pakig-istorya sa mo sa inyong pastor mahitungod niini, aron nga dili pud siya maghunahuna og dili maayo, kabalo na mo. Ipahibalo kaniya nga ania kami para makigtimbayayong, aron—aron tabangan ang kinatibuk-ang Lawas ni Jesus Cristo nga nagapuyo dinhi sa Dallas ug sa palibot nga dapit.

¹² Busa, ugma sa hapon, sa hunahuna ko, sa alas dos-traynta, mamulong ako og usa ka pang-ebanghelyo nga Mensahe. Ug pagkahuman igaampo nato ang tanang mga masakiton, kolektahon ang mga prayer kard ug mga ingon-anang butang nga nahibilin sa tibuok semana, ug igaampo silang tanan ugma.

¹³ Bueno ang akong hilisgotanan karong gabhiona mora'g medyo usa ka drama, sulod sa pipila ka gutlo. Ug paningkamotan pud nakong ilakip karong gabhiona kutob sa akong mahimo, ang pagpang-ampo alang sa mga may sakit. Ang akong teksto mao ang, “dili kamo managkahadlok, Ako kini,” nga si Jesus ang nagasulti. Ang akong hilisgotanan mao ang: *Usa Ka Pagpamatuod Didto Sa Dagat*.

¹⁴ Tingali'g dapit na sa kahaponon kaniadto, pasalop na siguro ang adlaw kaniadtong nahitabo kini, ug tingali'g mainit pud nga adlaw kaniadto nga sama dinhi karon.

¹⁵ Naguba man gud ang air conditioner, ug hinoon ginaayo na nila kini. Mao kana'y hinungdan nga giusab ko ang akong hilisgotanan, nga pagahisgotan gyud unta nako, aron nga madali ra ako niini, og aron sa dili na kamo manglingkod pa sa kainit nga sama niini.

¹⁶ Kining dakung mangingisda, human nga nasaksihan ang iyang nasinati sa tibuok adlaw niadto, nasaksihan gayud niya si Jesus diha sa Iyang halangdong ministerio.

¹⁷ Gusto ko gyud unta nga mabuhi usab niadtong panahona, nga nagasunod-sunod mismo Kaniya. Pero, abi ninyo, malipayon man gihapon ako nga nagkaaduna ako og pribilihiyo nga makapamuhat sa mao gihapong butang, nga masaksihan Siya nga nagapamuhat og mga butang. Ug mas mahimayaon pa gani nga masaksihan Siya sa karong panahon kaysa kaniadto. Tungod nga mas nagkaaduna na man ako’y pagtoo Kaniya karon, ug magkaaduna og dugang pa nga pagtoo sa karon kaysa kaniadto, tungod kay nagkaaduna na man kita og duha ka libo ka tuig sa pagpamatuod nga husto gyud ang Ebanghelyo. Ug human sa duha ka libo ka tuig, Siya’y buhi sa gihapon, nga ginabuhat mismo ang sama sa gipangbuhat Niya kaniadto, mao nga aduna kita sa karon og mas dakung kasiguradohan ug labaw pa nga pundasyon alang sa pagtoo kaysa nabatonan nila kaniadto.

¹⁸ Tungod kay, Tawo lang man kono Siya nga nagasangyaw kaniadto nga nagapamahayag nga—nga Siya’y pinadala sa Dios ug mao ang Anak sa Dios, ug bisan ginapanghimatud-an sa Dios ang Iyang gisaad nga Pulong alang niadtong panahona, pinaagi Kaniya, pero aduna gihapon sila’y pasumangil para duhaduhaan kadto. Ang mga teologo, nagduhaduha bitaw sila kaniadto! Ug matikdi ninyo nga usa kadto ka makapasubo nga butang, makapasubo gayud kadto, tungod kay managpanoo man unta Niadto ang mga teologo kung wala pa gibutahan sa Dios ang ilang mga mata. Mao kana ang ginaingon sa Biblia.

¹⁹ Ug kabalo ba mo nga gikasaad Niya nga pagabutahan Niya pag-usab ang ilang mga mata sa karong panahon, aron nga dili nila kini makita? Mamahimo silang “gahi’g-ulo, hambugiro, mahigugmaon sa mga kalingawan labi pa kaysa paghigugma sa Dios, dili-malukmay, tigbutangbutang, dili mapugnganon, walay gugma sa maayo; adunay dagway sa pagkadiosnon, apan ipanghimakak ang Gahum niini.” Tukma gayud nga saad nga mahitabo pag-usab. Ug wala gayud ka’y mahimo kondili ang malooy na lamang sa mga tawo, ingon nga nabutahan man ang ilang mga mata hangtud niining adlaw. Ngani ang mga Kasulatan nga gikasaad sa Dios nga mahitabo niining panahona mismo, sa niini nga panahon, nagalantaw na man kita mismo niini ug nagasaksi niini. Ug dayon bisa’g nakakita na ang mga tawo, ug ilingo-lingo ra man ang ilang ulo ug mopahilayo, moingon, “Wala ako makakita niini.” Usa kana ka makaluluoy nga butang, apan bisan pa man ang mga Kasulatan kinahanglan mamatuman gayud. Kinahanglan sa ingon niana gyud nga paagi.

²⁰ Busa kining mga tinun-an mga pinili na sa Dios. Namatikdan ninyo, giingnan sila ni Jesus, “Sa wala pa ang pagkatukod sa kalibutan,” gipili na Niya sila, ug sila’y mga gikatagana na nga binhi sa Dios. Mao kana nga pag nagaabot ang mga pagkalibog, ug daw sa gikorner na si Jesus sa mga mga tawo,

bahin sa usa ka pangutana, wala gyu'y pagduhaduha kanila. Wala man nila masabti kadto, apan determinado gayud sila nga wala na'y unsa pa man nga hibaloong gawas Kaniya. "Ikaw lamang ang adunay Pulong sa Kinabuhi." Ug determinado gyud sila nga magpabilin Niini, tungod kay gikatagana na man sila alang niadto nga katungdanan.

²¹ Ug mao man usab karong panahona, nga ang mga kalalaken-an ug kababayen-an, nga gikatagana na ngadto sa Kinabuhing Walay Katapusan, magaduol gyud sa Kinabuhing Walay Katapusan. "Ang tanan nga gikahatag Kanako sa Amahan magaari Kanako." Mao kana ang Iyang Pulong, ug dili gyud kana mapakyas. Kini'y—kini'y Pulong man sa Dios.

²² Ug mahanduraw nato karon kining mga tinun-an, nga nagkaaduna kaniadto og usa ka halangdon nga panagtigum niadtong adlawa, didto sa usa ka dakung umahan sa kilid sa usa ka bukid. Ug giingnan sila ni Jesus, "Karon pag-una na kamo sa pagtabok sa dagat, pag-una na Kanako." Ug tungod mitungas pa man Siya ngadto sa bukid, nga nag-inusara, para mag-ampo. Ug kining mga tinun-an, human nga nakahimamat og mga higala, mahanduraw ko gayud kung unsa ang ilang gibati.

²³ Tungod kay, inig makahimamat man gud ka og mga higala, ug kinahanglan na dayo'ng magbulag-bulag sa maong mga higala; nga bag-o pa lang gani mo nagkailhanay, dayon kinahanglan na ninyong manamilit. Ug kana sa una pa medyo maoy makapasubo gyud kanako, sa paglibot ko sa tibuok nasud, sa tibuok kalibutan, ang makahimamat og mga higala ug pagkahuman manamilit na kanila, ingon nga hingsayran mo nga daghan ang dili na nimo makita hangtud nga matagbo mo na lang sila didto sa Paghukom. Usa kana ka medyo masubo nga panghitabo.

²⁴ Tuod man mahanduraw ko ang maong sakayan, nga ang—ang atubangan niini anaa nakadunggo sa may baybayon. Ug si Simon Pedro tingali kadto, nga may maskuladong mga bukton ug mga abaga, ang nagtuklod sa sakayan ug gipaingon na kini ngadto mismo sa dagat. Ug silang tanan miwarawara sa ilang kamot sa pagpanamilit niadtong mga anaa sa baybayon. Ug nanagsinggit pud sila, "Pamalik baya mo ug dalha ninyo dinhi ang Magtutudlo aron duawon kami! Ug umanhi kamo'g magpahigayon og usa na usab ka rebaybal; napanalanginan gyud kami og ayo karong adlawa!" Ug miwarawara sa ilang kamot ang bag-ong mga kahigalaan. Ug misakay na siya uban ang tanang uban pa nga mga tinun-an, ug tingali milingkod tupad sa iyang igsoon nga, si Andres, ug gikuha na ang mga bugsay.

²⁵ Ang—ang mga sakayan kaniadto nagalayag man pinaagi sa hangin o kaha pinaagi sa mga bugsay nga ilang ipangbugsay. Ug dayon tingali'g nagasakay sila nga tinagurha sa usa ka

sakayan, tinagurha sa isig ka kilid, ug sila'y . . . o may duha sa usa ka lingkoranan, diay, og tingali'g duna pu'y unom o walo ka patonganan sa bugsay sa isig ka kilid sa sakayan. Dungan sila nga magbugsay, ug sa ingon-anang paagi ilang mapapabilin ang sakayan nga nakabalanse pag adunay mga unos. Dayon, kon normal pud ang hagueros sa hangin, mahimo ra nilang ipataas ang layag, ug maglayag.

²⁶ Tingali'g usa kadto ka mainit nga hapon, basi sa ginaingon sa Kasulatan sa wala pa kini nga panghitabo, ug mao nga malinawon gayud siguro, mahayag, og mainit nga hapon kadto. Pasalop na kaniadto ang adlaw. Ug sila, samtang nanagbugsay sila, ug dayon gibuhian sa ang mga bugsay ug nagwarawara sa ilang kamot sa pagpanamilit niadtong mga tawo, “Nagalaum mi nga mahimamat kamo pag-usab sa umaabot nga higayon,” samtang mipaingon na sila sa dagat. Ug misalop na ang adlaw, ug kilomkilom na gyud, ug wala magdugay nagsugod na nga—nga mingitngit.

²⁷ Ug tingali medyo okey ra ang kakusgon sa—sa ilang pagbugsay, tungod malisud man gud nga trabaho pag malusbog na sa dagat kadtong bug-at kaayo nga mga bugsay. Ug hinoon kadaghanan kanila mga—mga mangingisda man, ug dagku og kusgan nga mga kalalaken-an, nga mga anad na sa dagat. Ug nanagdahum sila nga mosakay si Jesus sa sakayan ug mosunod ra kanila, sa dili madugay. Mao nga, atua pa sila didto, ug siguro naghinay-hinay ra sila sa paglayag; nga medyo hinay-hinay nga ginapadagan ang sakayan, ug dayon dire-diretso na.

²⁸ Siguro ang batan-ong si Juan ang maong una nga misulti, tungod siya man ang pinakabatan-on sa grupo. Ug tingali siya ang miingon, “Medyo gikapoy na man ko. Maghinay-hinay lang kita sa paglayag. Kadali lang, dili man nato kinahanglang magdali. Wala pa man sàb Siya nakasakay, busa mas maayo pa nga maghulat sa kita sa makadiyut ug medyo mohanggab usa og presko nga hangin.”

²⁹ Ug samtang naglingkod si Juan didto nga medyo nakaduko ang iyang ulo, tingali'g nagsugod siya og usa ka panagtigum sa pagpamatuod. Ug mao kana ang buut kong hisgotan. Tingali siya ang unang mitindog, ug miingon, “Mga igsoon, bisan unsa pa'y isulti sa mga tawo, ug unsa man ka dili gustong motoo ni kinsa man, sigurado gayud ako karon, human niini nga adlaw, nga wala kita nagasunod sa usa ka maglilimbong. Ang atong ginasunod walay lain kondili ang Dios mismo, tungod wala ma'y si bisan kinsa ang makabuhat sa Iyang gibuhat karong adlaw gawas kon ang Dios kana. Abi ninyo, sa dihang gikuha Niya kadtong mga tinapay ug gipikaspikas kadto, ug gipakaon ang maong lima ka libo didto, mao kadto ang pinakamakabibulongang butang para kanako. Dili na mahimong aduna pa'y pagduhaduha hangtud karon,” bueno ako lang ginasulti'g

balik ang iyang pagpamatuod kaniadto, “apan mao na gyud mismo kadto.”

³⁰ Ingon pa, “Mahinumduman ko pa pila na ka tuig ang milabay. Nagapuyo ako kaniadto duol sa may Jordan. Ug akong mahinumduman, ingon nga usa pa ka batang lalaki, kung unsa nga ang matahum kong, Judio nga inahan, kugoson ako kaniadto, inig ka hapon, ug iya akong sabakon ug iduyanduyan ako, sa may balkonahe, sa diha nga nagapamulak na ang mga bulak nga poppy didto sa mga tampi sa Jordan. Ug pirmi siyang nagalantaw ngadto sa kamingawan, kon diin kaniadto gidala ang atong mga kabanay latas niadto nga kamingawan. Iya sàb akong ginasuginlan kaniadto og mga estorya sa Biblia. Ngani ang usa sa mahimayaon nga mga estorya nga akong mahinumduman, mao kadtong bahin sa Sunamitanhong babaye ug sa iyang batang lalaki nga namatay, ug—ug gibanhaw sa propeta kadto nga batang lalaki gikan sa mga patay. Usa kadto ka kulbahinam nga estorya kaniadto.

³¹ “Apan ang usa sa pinaka-kulbahinam nga mga estorya, nga ginasugilon kanako ni mama kaniadto, nga ginaingon niya, ‘Karon, Juan, usa pa lang ikaw ka gamay’ng bata; apan gusto ko nga imong hinumduman, sa imong pagdaku, nga, gipahigawas sa gamhanang Jehovah ang atong mga kabanay gikan sa Egipto kaniadto, ug milabang kita niadtong kamingawan og mitabok sa suba didto. Ug sulod sa kuwarenta ka tuig, silang tanan nanagpanaw niadto nga kamingawan, nga wala man la’y mga lugar nga palitanan og mga sinina, ug wala pu’y lugar nga kan-anan. Pero nagpaulan ang Dios og tinapay gikan sa langit, sa matag gabii, ug gipakaon ang atong mga kabanay didto sa kamingawan, tungod kay atua man sila sa linya sa pangatungdanan, nga mituman sa gamhanang Jehovah. Ug ania, sa umaabot nga adlaw, mamahimong unod si Jehovah dinhi ibabaw sa yuta, diha sa porma sa usa ka Tawo, og pagatawgon Siya nga Usa ka dinihogan, ang Mesias.’

³² “Ug akong mahinumduman,” ingon ni Juan, “ingon nga usa pa ka batang lalaki, daw sa unsa nga gipaningkamotang sabton sa bata kong panghunahuna, gipaningkamotan gayu’ng sabton, ‘Giunsa kaha pagpakaon sa Dios ang tanan niadtong, duha ug tunga ka milyon nga mga tawo, didto sa kamingawan? Giunsa kaha Niya pagkuha kadtong tanang tinapay?’ Ug ginapangutana ko si mama kaniadto, ‘Mama, Siya ba, aduna—aduna ba si Jehovah og dagku’g daghan nga mga pugon didto sa kawanangan, ug didto Niya ginaluto ang tanang tinapay, ug mokanaug inig magabii ug ipahimutang kadto sa—sa yuta, alang sa mga tawo, ug ang halapad nga kawanangan ni Jehovah puno ba og mga pugon?’ Moingon ang maong inahan, ‘Dili, anak, bata ka pa man gud kaayo para imong masabtan. Kita mo, si Jehovah usa man ka Magbubuhat. Dili na Niya kinahanglan og mga pugon. Igo lang Siyang mosulti, ug matuman dayon ang Iyang

Pulong pagmosulti Siya. Siya man ang gamhanang Jehovah, ug mao nga gisulti lang Niya kadto. Ug ang mga Anghel na ang nag-apod-apod niadto sa yuta, alang sa mga tawo.'

³³ “Ug niining panahon, sa dihang nakita ko Siya nga mitindog didto, namatikdan ba ninyo kadtong porma sa Iyang nawong? Wala gyu’y pagduhaduha sa Iyang hunahuna. Misaka ako didto sa may luyo sa bato, ug gitan-aw Siya samtang gikuha Niya kadtong tinapay ug gipikaspikas kadto, ug gitunol kadto sa . . . sa Iyang mga ministro, kanato, aron ipang-apod-apod kadto sa mga tawo. Ug pagkahuman sa dihang mikab-ot na pud Siya aron magpikaspikas pag-usab, kadtong tinapay nahimong tibuok pag-usab. Ug gibuhat Niya kadto sa gatusan ka higayon, hangtud nga nangabusog ang tanang tawo, ug duna pa gyu’y mga basket, nga gipangpuno, og gipangsudlan. Nasayod ako nga walay lain kadto kondili si Jehovah mismo, tungod kay namuhat man Siya nga sama sa gibuhat ni Jehovah kaniadto. Si Jehovah lang man ang makalalang. Ug nasayod ko nga kana nga Tawo dili gyud maglilimbong. Adunay usa lang ka Magbubuhat, ug kana mao si Jehovah. Ug karon, sa tanang mga butang nga akong nasaksihan, kumbinsido gyud ako niadto.

³⁴ “Mao nga buut kong inyong mahibaloan karon nga bug-os gayud nga nakasurender ang kasingkasing ko, ug bug-os sàb kong nagatoo nga dili lamang Siya usa ka propeta. Hinoon usa Siya ka propeta, apan Siya’y labaw pa gani sa usa ka propeta. Siya walay lain kondili si Jehovah nga Dios nga nagapuyo ipon kanato, tungod kay nagbuhat man Siya og tinapay, ug anaa gyud Kaniya ang mga kinaiyahan ni Jehovah. Dili ikatingala nga miingon Siya, ‘Kung wala Ko ginabuhat ang mga buhat sa Akong Amahan, nan ayaw ninyo Ako toohi; apan kung ginabuhat Ko ang mga buhat sa Akong Amahan, ug dili kamo makatoo Kanako, nan toohi n’yo ang mga buhat, tungod kay ang mga niini man ang nagapanghimatuod Kanako ug nagasulti kung Kinsa Ako.’ Nakita na unta kana sa mga tawo, sa ingon ka dali.”

³⁵ Ug kumbinsido gyud si Juan nga Siya mao ang Mesias, ang Usa nga gikasulti ni Isaias, “Alang kanato ang usa ka Anak natawo, ug ang Iyang Ngalan pagatawgon nga Magtatambag, Principe sa Pakigdait, Dios nga Makagagahum, Amahan nga Walay Katapusan.” Ug kumbinsido gyud si Juan tungod sa iyang nakita. Mao nga nakahatag og testimonyo ang maong batanong lalaki.

³⁶ Niadtong mga orasa usab, miingon si Simon Pedro, “Bueno, karon, kadali lang. Kung magkaaduna man diay kita og panagtigum sa pagpamatuod, nan aduna pud ko’y gustong isulti. Abi ninyo, aduna gyud ako’y pagduhaduha sa tibuok butang, kaniadtong si Andres nga akong igsoon, nga mitambong sa rebaybal ni Juan nga propeta, nga nagpamatuod nga moabot ang Mesias ug siya kono ang magpaila Kaniya. Ug medyo aduna ko’y pagduhaduha bahin sa ginasulti kanako ni Andres, tungod

kay nakadungog na man gud ko og tanan nang matang sa mga estorya mahitungod sa Mesias ug tanan nang uban pa.

³⁷ “Apan kamong tanan mga igsoon nakahinumdum man mo sa tigulang kong amahan. Jonas ang iyang ngalan. Ug nakahinumdum mo kaniya, kung unsa siya ka malig-on kaayo nga magtotoo. Ngani mahinumduman ko pa gayud si mama ug papa, ug kaming tanan, ingon nga pagpangisda man ang among panginabuhian, ug kon wala gyud kami’y mapukot ni usa ka isda; unya magkinahanglan pa kami og tinapay, ug daw sa unsa nga mangluhod kami sa salog ug mag-ampo sa Dios, ‘Hatagi intawon kami og mga isda nga mapukot karong adlaw, Dios, aron nga makabaligya kami og isda, ug mabayaran ang among mga utang, og aduna pu’y makaon.’ Ug daw sa unsa nga maglayag kami ngadto sa dagat, bisan dunay unos, ug mangahas gihapon mi nga—nga moatubang niadtong mga unos.

³⁸ “Ug si papa, makita ko ang iyang ubanon na nga buhok nga nakadunghay sa iyang likod, usa niana ka adlaw samtang naglingkod siya didto sa kilid sa sakayan ug giistorya ako, miingon, ‘Simon, ikaw man ang kamagulangan kong anak. Abi nimo, nagatoo gyud ako sa una pa, Simon, nga makita ko unta ang Mesias. Ang atong mga kabanay nanagpaabot man pud Kaniya sukad pa sa Eden kaniadto. Ug sigurado kita nga moabot gyud Siya, bisan unsa pa kadugay. Ngani upat na ka libo ka tuig ang milabay, moingon ka. Apan nagatoo ako nga moabot gayud ang Mesias. Ug nagatoo man ang matag Judio nga makita niya ang Mesias sa iyang henerasyon. Mao nga nagalaum ako nga makita ko unta Siya sa akong henerasyon. Pero mora’g, nagakatigulang na man gud ko karon, mao nga kinahanglan ko nang moundang sa pagpanagat, ug aduna na gani ko’y ginabati nga mga panakit-sakit sa lawas, mao nga tingali’g dili ko na Siya makita pa sa akong panahon. Pero basin ikaw ang makakita, anak ko.

³⁹ “Ug mao nga gusto kong bansayon ka bahin sa mga Kasulatan. Anak, sa dili pa motungha sa esena ang maong Mesias, magkaaduna man gud og tanan nang matang sa mga butang nga mahitabo, tanan nang matang sa mini nga mga butang, tungod kay buhaton gyud kana ni Satanas, aron gubaon ang impluwensiya sa tinuod nga Mesias pagmoabot na Siya.” Ingon na gyud niana sa una pa; ingon niana man gihapon hangtud karon.

⁴⁰ Ug dayon hingsayran nato, ingon niya, “Mahinumduman ko pa nga iya akong giagbayan, og miingon, ‘Anak, aduna lamang og bugtong paagi nga mahimo mong maila kana nga Mesias. Bueno gatusan na ka mga katuigan nga wala kita nagkaaduna og unsa man nga propeta. Ngani si Malaquias pa ang kaulahian natong propeta. Upat na ka gatus ka tuig ang milabay, nga wala kita nagkaaduna og propeta. Apan timan-i, gisultihan na man ta ni Moises, diha sa mga Kasulatan, nga, sa pag-abot

sa Mesias, mamahimo Siyang usa ka propeta, pagmotungha na Siya sa esena. Kita nga mga Judio gikatudloan man nga motoo sa propeta. Ug ang panaw sa Mesias dinhi sa yuta mao ang gilitok nga Pulong sa Dios, nga gisaad Niya kanato. Ug ang Pulong kanunay gayu'ng nagaabot ngadto sa usa ka propeta, ug ginapanghimatud-an sàb sa usa ka propeta ang maong Pulong. Ayaw kana hikalimti, anak! Mahimong dunay managpanungha nga dagkung mga butang, mahimong dunay hilabihan nga mga kadasig ug—ug halangdong mga butang. Apan timan-i, nga ang Mesias mamahimong usa ka propeta, tungod kay nasayod na man tà nga wala gyud ginausab sa Dios ang Iyang pamaagi, ug miingon man Siya nga ang Mesias mamahimong usa ka propeta. Busa timan-i, anak, nga ang mga propeta mao ra kadtong mga adunay Pulong sa Ginoo. Ug pagmoabot na ang Mesias, mamahimo gyud Siyang usa ka propeta.'

⁴¹ “Daw sa mabati ko gihapon hangtud karon ang iyang bukton,” ingon ni Simon, “samtang iya akong giagbayan kaniadto. Ug atua man gani si Andres nga nagahugas sa pukot, niadtong higayona. Nahinumduman mo ba kadto, Andres?”

“Oo, Simon, ako—nakahinumdum pa ko niadto.”

⁴² “Ug gipaningkamotang isulti kanako ni Andres nga kining si Juan usa kono ka propeta. Pero aduna ma'y uban pang mga butang nga kinahanglan kong buhaton kaniadto, kinahanglan ko pa nga ibaligya ang mga isda ug mga ingon-anang butang. Bueno bisan tuod og dugay na nga mga tuig nga namatay si papa, pero kanunay ko gayu'ng gitiman-an kadtong; gisulti ni papa, ‘Kini nga Mesias mamahimong usa ka propeta nga maila uyon sa Kasulatan, ug ayaw kana hikalimti, tungod kay mao kana ang gilitok nga Pulong sa Dios. Ug kana nga Pulong kanunay gayud nga nagaabot ngadto sa mga propeta; nga mao'y nagapaila niana, o nagapahayag sa kung unsa ang gikasaad na alang sa maong kapanahonan.’”

⁴³ Ug bueno si Simon, “Usa niana ka adlaw,” miingon, ingon siya, “kabalo mo, gihangyo ako ni Andres nga moadto sa usa ka panagtigum. Ug miadto ko didto sa maong panagtigum kon diin atua kining Lalaki nga, si Jesus, kaniadto. Ug nakadungog na man ko og tanan nang matang sa mga balita. Nga aduna kono'y Jesus nga mitungha, sa wala pa Siya, nga nagsaad nga mamahimong usa ka halangdon, gipangunahan kono kaniadto ang upat ka gatus ug silang tanan nangamatay, ug uban pa. Abi nako og usa na usab kadto sa ingon-niadto nga matang, nga dunay sa kung unsa nga klase sa dakung kadasig mahitungod sa usa ka rebaybal, o usa ka dakung denominasyon nga ilang pagatukoron. Apan usa ka adlaw nakahunahuna ko nga mokuyog ko dinhi kang Andres, nga akong igsoon.”

⁴⁴ Ug akong mahanduraw, niadtong mga orasa, nga hinay-hinay nang nauyog ang sakayan. Adunay usa nga misinggit, ug

ingon siya, “Lingkod mo! Ayaw n’yo uyoga ang sakayan. Kadali lang. Pabilin lang mo sa paglingkod.”

⁴⁵ Ug ingon pa siya, “Abi ninyo, sa pag-adto na nako didto ug miduol ko sa atubangan Niya, sa unang higayon, gitutokan ko Niya mismo sa mata ug gisulti kanako kung unsay akong ngalan. Wala pa baya Siya nakakita kanako kaniadto sukad-sukad. Dili lang nga nakaila Siya kanako, kondili nakaila sàb Siya niadtong diosnong tigulang kong amahan, nga mao’y nagtudlo kanako sa mga Kasulatan. Ug naila ko nga mao na Kadto ang Mesias. Para kanako mao na kadto, didto mismo. Mao na gyud kadto. Husto na kadto, para kanako.”

⁴⁶ Misulti pud si Felipe, “Mahimo ba akong mosulti dinhi?” Bueno ingon niya, “Igsoong Natanael, dili unta kini makapahiubos kanimo; tungod kay, kabalo na ka gitun-an baya nato ang mga kasulatan sulod sa daghang mga katuigan, kung mamahimong unsa gayud ang Mesias. Apan sa dihang nakita ko Siya nga gibuhat kadto, milakaw ako ug gidala ang akong higala dinhi, nga si Natanael. Ug sa pagduol na niya . . .”

Miingon si Natanael, “Ako na sàb ang magsugilon niana. Ako na ang magsugilon niana.”

⁴⁷ Oh, kabalo mo, aduna gyu’y sa kung unsang butang pag adunay gibuhat si Jesus para kanimo, dili nimo—nimo mahimong maghilum na lang, kinahanglan gyud nimong masulti kana, mismo. Dili ba tinuod kana? Kung usa kana ka butang nga tinuod, kinahanglan gayud nimong masulti kana. Ngani kaniadtong Iya akong gipuno sa Espiritu Santo, gusto ko usab isugilon ang mahitungod niadto. Gusto ko gayud nga adunay mahibalo mahitungod niadto. Dili nga si kinsa pa man ang mosugilon niini; kondili gusto gyud nakong isugilon kini, ako mismo.

⁴⁸ Ug akong mahanduraw, si Natanael nga bug-os gayud nga nadasig ug miingon, “Abi nimo, gusto kong isulti kini. Medyo nagduhaduha baya ko kanimo, Felipe, kaniadtong imo akong gisuginlan. Mao nga gipangutana tà ka, ‘May maayo bang butang nga nagagikan sa Nazaret?’ Pero imo akong gihatagan og pinakamaayong tubag nga mahimong itubag ni bisan kinsa nga tawo, ‘Adtoi lang ug tan-awa.’” Kana’y maayo baya gihapon hangtud karon. Tinuod. Ayaw pagpabilin lang sa balay ug mangsaway. Umadto ka, og tan-awa mismo, kita n’yo. “Miingon, ‘May maayo bang butang nga mogula gikan sa Nazaret?’ Miingon, ‘Umadto ka ug tan-awa mismo.’ Ug kabalo na man ka kung unsay gisulti mo kanako.

⁴⁹ “Ug sa dihang nakaduol na ko sa Iyang Atubangan, ug gisultihan Niya ako nga ako kono ‘usa—usa ka Hebreohanon, usa ka Israelinhon, ug usa ka matinud-anon nga tawo,’ naila ko dayon kadto.

50 “Apan nakahunahuna ko, ‘Giunsa kaha pagkahitabo niini?’ Mora ra man Siya og ordinaryo nga tawo. Gadahum man gud ko nga mokanaug ang Mesias sa mga bulawanong pasilyo gikan sa Langit, paingon mismo ngadto sa pangulo sa denominasyon dinhi, sa Jerusalem, moduol ug moingon, ‘Caifas, miabot na Ako.’ Apan hingsayran nila, nga mitungha Siya gikan sa Nazaret, gikan sa usa ka kabus nga pamilya; ug sa tinuod lang mora gani og may mahugaw’ng ngalan sa luyo Niya, ingon nga ‘usa ka ilehitimo nga bata.’ Atua Siya nga nagtindog didto, nakabisti og ordinaryo nga sinina, dili sama sa usa ka sacerdote o ni kinsa man; kondili usa lamang ka ordinaryo nga tawo. Ug sa hunahuna ko, sa dihang nakaduol na ko didto, ‘Unsaon man pagkahimo niana nga Mesias? Nagasul-ob ra og usa ka daan na nga bisti, nga ginasul-ob Niya sukad pa niadtong bata pa Siya, ug ania sul-ob gihapon kining mao ra nga bisti; ug nakadunghay ang Iyang buhok sa likod Niya. Ug sama ra gyud sa usa ka ordinaryong tawo sa kalsada.’

51 “Ug Iya akong gitutokan sa nawong, ug miingon, ‘Sa wala ka pa gitawag ni Felipe, sa didto ka pa ilalum sa kahoy, nakita Ko na ikaw.’ Mao na mismo kadto para kanako. Nasayod ako, pinaagi sa Pulong, nga mao na kadto ang Mesias. Siya gayud kadto.”

52 Ug ang sakayan tingali’g nagauyog-uyog na, pero nagpadayon gihapon ang maong panagtigum sa pagpamatuod. Oh, pagkaanindot nga kahigayonan nga aduna sila kaniadto, didto sa dagat, nagkaaduna gayud og mahimayaong higayon.

53 Miingon si Andres, “Aduna sàb ko’y gustong isulti nga medyo nagpahibulong kanako sa hamubo nga panahon. Mahinumduman n’yo pa ba kaniadtong nagpaingon kita—kita sa Jerico? Miingon Siya, ‘Moadto sà tà didto; tungod gikinahanglan pa man Nako nga moagi sa Samaria.’ Busa, miadto Siya sa Samaria ug didto sa lungsod sa Sicar, nga gipalakaw Niya kitang tanan aron mopalit og pagkaon didto sa siyudad.”

54 “Oh, oo, nahinumdum pa kaayo ko, niana!” Silang tanan, “Oo, oo!” Nagauyog-uyog na gayud ang sakayan, pero ang tanan nagkaaduna ra og maanindot nga testimonyo pagkahuman sa rebaybal. Mao nga nakapahigayon sila niini nga panagtigum sa pagpamatuod.

55 Ug ingon pa si Andres, “Oo, ug mahinumduman n’yo nga hinay-hinay baya tàng namalik, ug, nakurat kita, tungod nakita man nato ang atong Magtutudlo nga nakig-istorya sa usa ka gibantog nga bigaon. ‘Uh-huh,’ sa hunahuna nato, ‘dili kana maayo. Tan-awa gani Siya dinha nga nagapakig-istorya sa nianang batan-ong babaye. Ug gipalakaw kita, samtang anaa ra diay Siya dinha uban kining mahugaw’g-dungog nga babaye nga nagalingkod dinha.’ Mahinumduman n’yo, nga nanagtindog lang kita luyo sa mga kakahoyan, ug naminaw tà sa ilang panag-istoryahanay.

56 “Ug nadungog nato Siya nga miingon sa maong babaye, ‘Babaye, lakaw ug kuhaa ang imong bana ug balik dinhi.’

57 “Ug miingon tà, ‘Bueno, basin nasayup ra kita, tingali’g ang maong babaye legal gyud diay nga nakasal.’

58 “Ug mitan-aw Kaniya ang babaye, ug miingon, ‘Sir, wala man ko’y bana.’

59 “Mahinumduman n’yo ba nga nahugno gayud ang atong mga kasingkasing? ‘Ang atong gamhanang Mesias nga atong gisaligan, ania nasakpan nga namakak, taliwala sa panag-istoryahanay, tungod kay ang ingon Niya, “lakaw ug kuhaa ang imong bana,” ug mitubag man sàb ang babaye nga wala siya’y bana. Mao nga misumbalik kadto Kaniya.’ Mahinumduman n’yo kung unsa nga kitang tanan nahingangha gani pag-ayo, ug mora kita’g nahutdan og ginhawa?”

“Oo, nahinumdum ko niana.”

60 “Ug dayon mahinumduman n’yo pa ba ang sunod nga mga pulong? Ingon Siya, ‘Tinuod ang imong giingon, tungod kay nagkaaduna ka na og lima, ug ang usa nga gikaipon mo karon dili man imong bana.’ Oh, mahinumduman n’yo ba kadto nga panagtigum sa pagpamatuod luyo sa kakahoyan? Grabe!” Kita n’yo, dili gyud ninyo ma-korner Siya. Tungod Dios man Siya. “Oh,” ingon si Simon, “kadto gayu’y . . .” ingon si Andres, “Mao na mismo kadto para kanako.”

61 Miingon si Bartolome, “Kadali, gusto kong mohatag usab og testimonyo. Mahimo ba akong magpamatuod sàb, mga igsoon?”

62 “Oh, bueno, puede ra man siguro, tungod aduna pa man kita’y hataas nga oras. Wala pa man sàb Siya miabot, busa magbugsay lang tà og diyutay. Sige, Bartolome, magpamatuod ka na.”

63 “Bueno, ang usa sa mga halangdong butang para kanako, mahinumduman n’yo ba ang igsoon natong babaye didto sa Jerico, nga ginganla’g Rebekah?”

“Oo.”

“Ug ang iyang bana gani dunay ginadumalahan nga restawran didto.”

“Uh-huh.”

64 “Ug—ug ang maong tawo usa man ka negosyante, ug ang ngalan niya mao si Zaqueo.”

“Oo, oo, nahinumdum gyud ko niya.”

65 “Mahinumduman n’yo, siya’y—siya’y usa sa mga igsoon natong babaye. Mitoo gyud siya sa Ginoo, ug mao nga nabalaka siya kaayo nga basin og masayloan ni Zaqueo kining tanan nga wala man lang ginadawat si Jesus. Ug, oh, si Zaqueo sàb usa man ka suod kaayo nga higala sa sacerdote didto. Ug mao nga nagaampo gayud ang maong igsoong babaye nga unta

adunay mahitabo aron mabuka ang mga mata sa iyang bana, ug maila sa iyang bana nga kini mao ang Magtutudlo, kini mao ang gipanghimatud-an nga Pulong sa Dios, nga nahimong unod sa taliwala nato. Ug ngani gipaningkamotan natong sultihan siya. . . sultihan si Zaqueo mahitungod sa kung unsa nga nahibaloan ni Jesus nga taga-Nazaret ang mga tinago sa kasingkasing, nga nagapakita nga Siya mao mismo ang Pulong, tungod kay ang Pulong nagatugkad man sa mga hunahuna nga anaa sa kasingkasing.

⁶⁶ “‘Binuang,’ ang ingon sa maong bana, ‘ang sacerdote man ang akong ginatoohan. Kung unsay ginaingon sa sacerdote igo na gyud para kanako.’ Tungod kay miyembro man gud siya sa tanan nga—nga mga kapunongan sa siyudad, sa Kiwanis ug tanan nang uban pa, kabalo mo, mao nga siya. . . medyo malisud para kaniya nga buhian kini. Busa mihangyo si Rebekah kanatong tanan nga mag-ampo—nga mag-ampo. Ug sa matag higayon nga modangat kita sa hilisgotanan nga si Jesus usa ka propeta, moingon ra si Zacqueo, ‘Binuang! Miingon man lagi ang sacerdote nga, “Siya’y Beelzebub. Usa Siya ka yawa. Ginabuhat Niya kana pinaagi sa gahum sa yawa. Ug usa lamang Siya ka mental telepathist. Mao lang kana. Wala kana’y pulos.” Busa wala gayu’y ingon-anang butang sa niining panahon; wala na man kita nagkaaduna og mga propeta sulod sa gatusan na ka mga katuigan. Ug sa unsa mang paagi nga kanang Lalakiha, wala man gani’y fellowship kard, sa unsa mang paagi nga mamahimo Siyang usa ka propeta? Oh, wala gyu’y paagi nga Siya’y mamahimong ingon niana!’

⁶⁷ “Apan, kabalo mo, padayon lang gihapon nga misalig si Rebekah, ang iyang asawa, ug nagsige’g-ampo. Ug usa niana ka buntag kaniadtong paadto na si Jesus ngadto sa siyudad, bueno, hingsayran nato tungod, gisultihan man ta ni Rebekah nga si Zacqueo kono miadto sa—sa kalsada, para makita Siya. Pero ingon nga wala nagatoo ang iyang bana nga Siya’y usa ka propeta, mao nga ingon niya, ‘Tan-awon ko lang Siya pag-ayo,’ nagpamatuod pa gani si Zacqueo nganhi kanato didto sa restawran niadtong miaging adlaw sa dihang nangaon ta. Ug mikatkat kono siya sa punoan sa sikomoro, ug miingon, ‘Kabalo mo kung unsa, motago lang ko mismo dinhi sa ibabaw aron dili Niya ako makit-an. Hinoon, gamay’ng tawo ra man ko, og mubo kaayo. Ug mao nga dili pud ko makakita Kaniya dinha sa ubos, tungod sa kadaghan og tawo, busa mokatkat na lang ko dinhi sa punoan.’ Ug nakadangat siya sa kon diin may duha—duha ka sanga’ng nagtagbo, ug didto milingkod siya, niadto nga mga sanga.”

⁶⁸ Maanindot gayud nga puwesto kadto para malingkoran ug magtuon niini. Dinha usab nagatagbo ang duha ka dalan, ang sa imo ug sa Dios; ang imong mga ideya. Hinoon maayo kana nga butang, para pamalandungon.

69 “Ug miingon si Zacqueo, ‘Kabalo mo kung unsa, tingali’g usa gyud Siya ka propeta. Tingali’g ingon niana Siya. Pero mamahimo pud nga basin sayup ra ko. Busa sultihan ko kamo kung unsa, sud-ongon ko Siya; ug dili man Niya ako mailhan. Mao nga iwahing ko ang tanang dahon ug birahon kini nga nakaingon-ini, sa palibot nako, ug motago ko mismo aron dili gyud Niya ako makit-an. Ug matikdan ko Siya sa pag-agi Niya. Ug kung dili Siya mora’g matarung nga matang sa tawo, nan sawayon ko gayud Siya, samtang naglingkod ko dinhi sa ibabaw niining punoan.’ Tuod man naniid siya, ug dunay dahon nga iyang gipasalipod ug para makalili kang Jesus inig abot Niya sa may kanto.

70 “Ug sa pag-abot na Niya sa may kanto, nga nagalakaw sa kalsada, kabalo mo, nga nagatan-aw gikan sa usa ka bahin ngadto sa pikas bahin, ug ang mga tinun-an nagaingon, ‘Padaplin sa mo. Pasensya na.’ Ug ang mga tawo aduna pa’y mga anak nga masakiton ug tanan na. ‘Pasensya na, gikapoy man gud kaayo ang Magtutudlo; tungod sa mahimayaon nga panerbisyo kagabii.’ Ug, ingon nga buutang lalaki, ‘Mahimo ba nga magpadaplin kamo para makaagi Siya, samtang Siya gapaingon Siya ngadto sa siyudad, ug mahimo ba nga magpadaplin lamang kamo?’ Ug si Zacqueo sab atua ibabaw sa kahoy, nga nagadungaw Kaniya.

71 “Ug miduol mismo si Jesus sa ilalum sa kahoy, mihunong, mihangad ug miingon, ‘Zacqueo, kanaug dinha. Mouban Ko kanimong pauli karong adlaw, para sa panihapon.’ Mao na kadto para kanako. Tungod nga nahibaloan man Niya nga atua si Zacqueo didto sa ibabaw, ug nahibaloan pud ang iyang ngalan, kung kinsa siya. Mao na mismo kadto. Mao na kadto ang Mesias, para kanako. Oo, sir. Tungod kay, nasayod na man ta nga ingon-ana ang pagabuhaton sa Mesias. Sigurado gayud. Bueno kinahanglan Niya kono nga mouban kaniya pauli, ang ingon, niadtong adlaw para sa panihapon. Pagkaanindot nga higayon kadto! Mahinumduman gyud nato kadto.”

72 Kabalo mo, mga ingon-ani nga oras tingali kaniadto, nga nahitabo ang maong panagtigum sa pagpamatuod. Kabalo na mo, nga kining mga tinun-an atua sa dagat, nagapamatuod, tingali’g nagakangitngit na sa kon asa man, didto sa mga amihanang-yuta, diin si Satanas tingali misaka didto sa bungtod ug midungaw. Mitan-aw siya niadtong panagtigum sa pagpamatuod, ug hingsayran niya nga nanglakaw sila nga wala gikauban si Jesus. Mao na kadto ang iyang kahigayonan.

73 Kita n’yo, sa hunahuna ko nagakahitabo pag-usab kadto nga esena, nagakahitabo mismo pag-usab. Sila kaniadto, diha sa kadasig tungod sa rebaybal, nanglakaw sila nga wala Siya gikauban. Ug nagatoo ako nga ingon niana gayud ang nahitabo kanato sa karong panahon, nga, sa niining panahon sa kalibog, ug human niining dakung rebaybal nga atong nasaksihan.

Mikaylap na kini sa tibuok kalibutan. Ngani ang matag nasud nagkaaduna man og mga kalayo sa rebaybal, nga nagadilaab; dagkung mga panerbisyo sa pagpang-ayo; nagadawat sàb sa Espiritu Santo ang mga tawo, napulo ka linibo ka pilo. Ug diha sa kadasig tungod niini, sama niadtong mga tinun-an nga nagapamatuod bahin sa mga gipamuhat ni Jesus, “ug, oh, nakita nato Siya nga nagbuhat og *ingon-ani*, ug nakita pud nato Siya nga nagbuhat og *ingon-ana*,” nagatoo ko nga nanagpanaw sàb kita nga sama kanila kaniadto, wala Siya gikauban.

⁷⁴ Nahitipas kita tungod sa mga dagku kaayong oportunidad nga—nga ginahanyag sa rebaybal. Nahitipas kita tungod sa mga oportunidad nga makapanguwarta og daghan, ang mga kasimbahanan, para makapatukod og mas dagkung mga bilding, dagkung minilyon-ka-dolyares nga mga lugar, dagkung mga tulonghaan, mga sistemang pang-edukasyon, ug para mapalambo ang atong mga denominasyon. Ug dayon ang magkaaduna sàb og mga programang pang-komunismo, antikomunismo, mao na lang kana ang atong ginahisgotan sa karong panahon. Ug mahibaloan mo na lang, nakita diay tà ni Satanas diha sa atong mga programang pang-antikomunismo, diha sa atong mga programang pang-denominasyon, ug diha sa atong “pagpadaghan og usa pa ka milyon,” ug uban pa, sama sa nabatonan nila.

⁷⁵ Ug nahitipas kita nga wala na napahibalik ang kinaraang mga panagtigum sa pag-ampo ug ang bautismo sa Espiritu Santo, hangtud nga mihinay na ang kalayo. Mahimo mong mosinggit, ug paninguhaong maaghat ang mga tawo nga moduol sa altar, ug nanambong man sila pero mora na sila’g mga patay halos, ug nagakatahap nga moduol. Ug dayon hangyoon ang mga ministro nga moanha og iampo sila, “Oh, nganong gihangyo pa man ko niya?” Ug mangduol lagi sila dinha, pero halos dili mo gayud sila mapaduol. Ug motindog sila dinha sulod sa pipila lamang ka minuto, motan-aw lang kanimo, ug mobalik na ug molingkod sa ilang mga lingkoranan. Mao nga para nako, napalong na gayud ang kalayo! Aduna na’y nahitabo. Paminaw mo! Ang gikinahanglan nato mao ang usa ka rebaybal, aron ang mga makasasala, pag molantaw kang Cristo, managhinulsol, moduol sa gilayon ngadto sa altar nga ginapataas ang ilang mga kamot, magatuaw alang sa kalooy, ug ang tibuok iglesia mamahimo gayu’ng usa ka nagadilaab nga kalayo, nga may himaya sa Dios.

⁷⁶ Tungod sa atong kadasig nga para lang sa kahigayonan nga mapalambo ang atong mga denominasyon, nagpatukod kita og mas dagkung mga tulonghaan aron tudloan ang atong mga ministro, ug mas ginapahilayo sila gikan sa Dios kaysa kung unsa sila kaniadto sa sugod pa lang. Ang Dios dili man maila pinaagi’g edukasyon. Dili sàb Siya maila pinaagi’g teolohiya. Kondili maila ang Dios pinaagi’g pagtoo. Dili n’yo mahimong

isaysay ang Dios. Siya'y lagpas pa gayud sa mahimo nga pagsaysay.

⁷⁷ Tan-awa n'yo kung unsay gibuhath niini, kanatong mga Pentecostal nga mga pentecostes unta kaniadto. Ginapaputlan na sa atong mga kababayan-an ang ilang buhok, og nagapangmeyk-ap na sila. Pero ginatugotan ra kini sa atong mga kalalaken-an. Ginatugotan ra kini sa atong mga ministro. Tungod nangahadlok sila nga mosulti og usa ka butang mahitungod niini. Ipalagpot man gud sila sa iglesia kung mosulti sila. Oh, ambot kung wala pa ba kaha kita nagkinahanglan og pagpanglimpyo sa balay, gikan sa pulpito hangtud sa basement. Makauulaw kini. Kaulawan gayud.

⁷⁸ May usa ka lalaki nga miduol kanako, dili pa lang dugay, ug miingon, "Igsoong Branham, gihigugma man ka sa mga tawo." Pero miingon, "Pirmi man gud nimong ginabadlong sila, ginabadlong silang mga kababayan-an, tungod nga adunay mugbo nga buhok ug mga ingon nianang butang."

Ingon ko, "Miingon man ang Biblia nga kaulawan para sa babaye nga magkaaduna og ingon-nianang buhok."

⁷⁹ Iyang ginapakaulawan ang iyang bana pagbuhaton niya kana. Ug kana'y bug-os gayud nga ilhanan nga napahilayo ka na sa Dios. Hinumdumi n'yo, nga sa kahintang ni Samson kaniadto, ang taas nga buhok mao'y usa ka Nazareong ilhanan nga mibiya na siya sa kalibutan, paingon sa Pulong sa Dios. Ug kon ginapaputlan n'yo ang inyong buhok, mga kababayan-an, nan ginasalikway n'yo ang inyong Nazareong ilhanan. Mipaingon hinoon kamo sa Hollywood imbis nga mobalik unta sa Biblia. Ang Biblia miingon, "Dili sila puedeng magpaupaw." Kita n'yo, makauulaw kana, pero ang mga ministro wala man la'y ginasulti nga bisan unsa mahitungod niana.

⁸⁰ Miingon kanako kini nga lalaki, "Nganong dili na lang nimo pasagdan silang mga kababayan-an?" Ingon pa, "Ginaila ka baya nila ingon nga usa ka propeta."

Ingon ko, "Wala baya ko nagsulti sukad-sukad nga usa ako ka propeta."

⁸¹ Miingon, "Pero ginaila man ka nila nga ingon niana. Mao nga tudloi hinoon sila kung unsaon pagdawat sa espirituhanon nga mga gasa ug sa pagbuhath og usa ka butang. Angay unta nga tudloan mo sila og dagkung mga butang, halangdong mga butang."

⁸² Ingon ko, "Unsaon ko man pagtudlo kanila og Algebra nga ayaw man gani nila nga makakat-on sa ilang ABC, kung unsaon sa pagkinabuhi nga desente bahin niini? Unsaon mo man sa pagbuhath niana? Mao bitaw, nga magsugod sa mo sa pinakauna nga butang."

⁸³ Ngani sa kada tuig, nga nagabiyahe ko sa tibuok nasud, ug nagakagrabe na hinoon kini sa kanunay. Aduna gyu'y sayup sa kung asa man, pero dili sa Pulong. Dili ikatingala nga dili na kita mahimong magkaaduna pa og mga nagadilaab nga kalayo sa rebaybal. Ang gikinahanglan nato mao ang oras sa pagpanglimpyo sa balay. Pero dili gayud kana pagabuhaton sa Dios gawas kon mobalik kita pag-usab. Nagkinahanglan gyud kita og oras sa pagpanglimpyo sa balay.

⁸⁴ Ug ikaw lalaki, ginatugotan ra nimo ang imong asawa nga mobuhat sa ingon-anang butang, ang magsul-ob og purol! Dili gani sila mga Methodist, mga Baptist. Kondili mga Pentecostal sila mismo, tinuod kana, “may dagway sa pagkadiosnon, ang kapanahonan sa Iglesiang Laodicea, og dagaang,” Pentecostal ra sa ngalan, kana lang. Pero ang Pentecostes dili man usa ka ngalan, kondili usa kini ka kasinatian nga iya sa bautismo sa Espiritu Santo, nga mao'y nagahinlo sa mga tawo. Dili ikatingala nga dili na kita mahimong magkaaduna pa og dagkung mga buluhaton sa pagpang-ayo ug mga ingon-anang butang, tungod aduna ma'y butang nga nasayup sa kung asa man. Si Satanas, nga nakakita kanato nga nagapaninguha nga . . .

⁸⁵ “Bueno, kon mosulti kami og unsa mang butang mahitungod niana, basin man gud og mobalhin sila og pamiyembrohan.”

⁸⁶ Hinumdumi, nga dili ninyo angay'ng hapuhap-hapuhapon ang mga Cristohanon. Pag Cristohanon gyud malig-on. Sila'y mga kalalaken-an ug mga kababayan-an sa Dios, nga nagabarug alang sa Dios, bisan unsa pa ang isulti ni kinsa man. Dili n'yo na kinahanglang hangyo-hangyoon pa sila ug kumbinsihon sila, ug pahumotan sila ug bebi-bebihon sila. Mao kanang kinahanglan pang amumahon, gi-hybrid nga mga tanum, wala gayud kana'y pulos, tungod dili man kana magapamunga og bisan unsa.

⁸⁷ Nahinumduman ko hinoon, ang sama sa usa ka . . . Hapit na man ang panahon sa pagpanglumlom. Ngani namatikdan ko niining adlawa ang gagmay'ng mga langgam, didto, ang gagmay'ng mga maya nagadala na og dagami ngadto sa ilang mga salag. Dili magdugay maglumlom na sila, og himoong mapusa ang ilang mga itlog. Kabalo mo, mahimo man sa usa ka gamay'ng langgam nga magkaaduna og usa ka salag sa mga itlog, ug mahimo niyang lumluman kana nga salag sa mga itlog, ug bali-balihon niya ang mga niini sa matag pipila ka minuto; gamiton ang gagmay niyang mga tiil ug balihon ang mga niini, ug maglumlom dinha. Karon, kung pasagdan niya nga mabugnawan ang maong mga itlog, human nga gipainitan na ang mga niini sa makausa, dili man sila mapusa. Ug mao molupad sa siya ug mokuha'g diyutay'ng pagkaon, ug mobalik gyud dayon ngadto sa mga itlog.

⁸⁸ Ug kabalo mo, kanang inahang langgam, mahimo man niyang lumluman ang mga itlog, ug bali-balihon kana sa matag pipila ka minuto, ug dili. . . bisan pa'g mosakripisyo nga dili mokaon hangtud nga maluya na siya og dili na makahawa sa salag. Apan gawas, kon, gikatagbo nianang inahang langgam ang lalaking langgam, dili gyud mapusa ang mga itlog. Bisan unsa pa man, bisan imo pa silang bebi-bebihon og ayo, dili gihapon sila mapusa. Magpabilin ra sila diha mismo sa salag ug mabugok.

⁸⁹ Ug kung aduna ma'y panahon karon na mismo nga angay'ng makig-uban ang Pentecostal sa Kapikas, kang Jesus Cristo; tungod wala man kita'y nangakuha nga bisan unsa gawas sa usa ka pugaran nga puno og mga bugok nga itlog, ginapanghimakak ang Pagtoo, nga nagasulod na ngadto sa Ekuminikanhong Konseho, ug ginatawag kana ingon nga halangdong mga butang kono, ang molingkod tupad sa papa, ug moingon pa nga "espirituhanon kono kana." Unsa ba'y nagakahitabo sa kalibutan, kaninyo nga mga Pentecostal? Wala ba mo mahibalo nga gisulti na sa Biblia nga mamahitabo kining mga butanga? Ug nagatuaw kita tungod kay nagasulod na ang mga Methodist ug mga Baptist, ug dayon kining tanang uban pang mga butang nga sama niana. Wala n'yo ba naamgo nga sa kaniadtong miadto na ang nagakatulog nga mga dalagang ulay aron mopalit og Lana, mao pud kadtong taknaa mismo nga miabot ang Pamanhonon? Ug wala na sila nakakuha og Lana! Kabalo mo, nga moabot baya ang Pagsakgaw nga ingon ka sekreto, ug ang pagbiya, usa sa niining mga panahona, pero dili gayud kamo mahibalo nga nahitabo na diay kini. Nahitabo na diay kini, ug mahibulong na lang mo kung unsa kaha ang nahitabo.

⁹⁰ Sama ra niadtong miabot si Juan sa yuta. Ug miingon sila kang Jesus, ang ingon, "Bueno, miingon ang Biblia, nga kinahanglan moabot una si Elias." Ingon Niya, "Miabot na siya, ug wala n'yo nasayran kini."

⁹¹ Mao man usab gihapon, sa umaabot nga adlaw, moingon sila, "Abi ko og mahitabo una kini sa dili pa ang panahon sa Kasakitan. Abi nako og mahitabo usa ang Pagsakgaw." Mosumbalik mismo ang mga pulong, "Nahitabo na kini ug wala n'yo kini hingsayri." Uh-huh. Mamahimong ulahi na kini kaysa inyong ginahunahuna. Oh, pagmata na, iglesia! Mas maayo pa nga mohunong na ako bahin niana; wala man ko mianhi dinhi para sa doktrina, pero nahunahuna ko lang nga isulti kana aron magkaaduna kamo og dugang kahibalo bahin niana.

⁹² Hinumdumi, igsoon, nga nakita ni Satanas kining dagkung mga programa, usa ka iglesia nga gapaningkamot nga labwan ang usa pa, usa ka denominasyon nga gapaningkamot nga labwan ang usa pa, ginawagtang ang tanang kawalay-edukasyon ug kinahanglan kono nga magkaaduna sa sila og eksaminasyon sa sikolohiya, eksaminon una sa usa ka

sikolohista ang usa ka lalaki adisir pa kini moadto sa natad sa pagpangmisyon. Mga Pentecostal pa gyud! Dili, dili man kana—kana—kana mga Presbyterian, kondili mga Pentecostal mismo. Gikinahanglan sa kono ang usa ka eksaminasyon sa sikolohiya sumala sa usa ka grupo sa mga Pentecostal, daku nga grupo, sa dili pa mahimong moadto sa natad sa pagpangmisyon ang mga misyonaryo.

⁹³ Unsa kaha kung nagkaaduna pud sila kaniadto og eksaminasyon nga sama niana? Hinoon nagkaaduna man sila og usa ka eksaminasyon. Usa kadto ka eksaminasyon sa pentecostes sa sinugdan pa lang, kaniadtong nanaghulat sila didto sa hataas nga lawak hangtud nga mikunsad ang Kalayo gikan sa Kahitasan, ug ang Gahum sa Dios. Mao kadto mismo ang eksaminasyon.

⁹⁴ Dili nga kung kinsa man nga kalibutanong, medyo hubog nga sikolohista nga atua didto para eksaminon ang panghunahuna, nga kung medyo ginanerbiyos ka, o unsa man, moingon dayon, “Dili ka pa gayud puede.” Sa dihang, bug-os mang napamatud-an nga ang usa ka tawong espirituhanon gayud nerbiyoso kana siya, kinahanglan man niyang maanaa sa ingon-ana nga kahintang aron makasulod Niini. Busa mao kana, kita n’yo, pero ginadaut nila kung unsa ang gipaningkamotan sa Dios nga buhaton sulod sa daghang mga tuig, ug nagabalik hinoon sa ila mismong mga programa ug sa ilang dagkung. . .

⁹⁵ Ngani mangadasig gayud sila pag makakita sila og daghang mga tawo nga nanagkatigum. Moingon, “Kung mahimo ko lang unta nga himoon silang Assemblies tanan! Kung mahimo ko unta nga himoon silang Oneness tanan! Kung mahimo ko unta nga himoon silang Methodist tanan!” Ginapaningkamotan sa Methodist nga himoon silang Methodist tanan, ginapaningkamotan pud sa Baptist nga himoon silang Baptist tanan, ang mga Pentecostal usab nga himoon silang mga Pentecostal tanan! Oh, wala na gyud kamo’y mahimo bahin niini, gitagana na man sila sa Dios sukad pa sa pagkatukod sa kalibutan. Pero kinahanglan gihapon natong iwali ang Maayong Balita. Kana lang. Apan, tungod lagi sa atong dagkung mga programa, nanagpanaw kita nga dili kauban ang Kalayo. Mao nga nahitipas kita ug naghimo hinoon ta mismo og usa ka hinimo’g-tawo nga kalayo, sama sa kung unsa kaniadto.

⁹⁶ Ug tungod sa atong komunismo, nangahadlok kaayo ta karon, ingon nga nagsugod na ang komunismo, “Unsa na kaha ang mahitabo?” Apan, kabalo mo, ang makahahadlok nga butang dili baya ang komunismo. Sultihan ko kamo niini karon, wala gyud ako mahadlok sa komunismo.

⁹⁷ Apan ang akong gikahadlok, kamong mga Pentecostal, tungod nga kontrolon man kamo niining Ekuminikanhong Konseho. Mao kana ang makahahadlok. Pagapormahon niini ang marka sa mapintas nga mananap, ug siguradong

mahiapil gyud kamo niini. Tungod kay usa man kamo ka organisasyon, siguradong mahiapil kamo o kaha mogawas kamo. Ingon niana gayud, ug ang si kinsa mang maayo, salabutanon, og espirituhanon nga tawo nasayod gyud niana. Gikinahanglan nato og usa na usab ka pagpamatuod dihasa-dagat, nga atong nahibaloan karon. Ug ang atong mga Pentecostal, nanagdawat lang sàb niana, ingon nga wala gyu'y pagpanuko, “Pagkahalangdon kana nga butang pagmahitabo!” Pero nianang higayona, Methodist, Presbyterian, Lutheran, church of Christ, ug mga Pentecostal, kinahanglan man ninyong ipanghimakak—ipanghimakak ang inyong halangdong apostolikanhong doktrina, aron nga makasulod dinha. Mao gihapon ang pagabuhaton nilang tanan. Wala na kamo’y mahimo pa bahin niana. Tungod kanang tanan mahiusa man gyud sa Roma, sa ingon ka eksakto kung unsay napamatud-an na. Mao kana ang ginaingon sa Kasulatan.

⁹⁸ Unsa na ma’y nagakahitabo sa niining mga magwawali nga ginatugotan lang kining mga butanga nga nahidangat sa ingon-niini nga kahimtang, og wala man lang ginapasidan-an ang mga tawo? Siguradong paninglon kini sa Dios sa ilang mga kamot. Ngani sa niining panahon mismo sa kalisdanan, anaa na sila mismo sa kalisdanan, anaa na gyud sila sa kalisdanan. Dili baya ang komunismo ang maoy maghari; kondili ang Ekuminikanhong Konseho mismo ang magalamoy sa kinatibukang pundok. Ug timan-i n’yo, pagmoingon mo, “Dili man . . .” Mahitabo gyud kana, dayon mahimong ulahi na kaayo. Tungod human na man ninyong gidawat ang marka sa mapintas nga mananap. Nianang tungora mismo nahisakop na kamo niana.

⁹⁹ Mas maayo pa nga moadto ka na karon sa dapit kon diin makalingkawas ka pa niini, oo, sir, magpaselyo na pasulod sa Ginghamarian sa Dios. Ingon nga ang Lawas ni Cristo mao man ang mistikal nga Lawas ni Cristo, nga kita gibautismohan pasulod ngadto Niini pinaagi sa Balaang Espiritu; dili nga nagpamiyembro pasulod Niini, dili nga gidala pasulod Niini, dili nga giaghat lang pasulod Niini, dili nga nagsulti-og-laing-mga-pinulongan pasulod Niini, og dili nga misinggit pasulod Niini. Kondili natawo ka mismo pasulod Niini, pinaagi sa Espiritu Santo. Husto. Tinuod gayud.

¹⁰⁰ Bueno atong mamatikdan kining mga butang, nga nagaabot ang problema sa kalit lang. Oh, mitan-aw ang yawa ug miingon, “Uh-huh, nahinayak na sila, atua na sila nga nagalukso-lukso, nanagsinggit, og nagkasadya gayud. Kabalo ka kung unsa, karon na mismo ang oras nga ipaunlod ko sila. Makapanimalus na gyud ko sa ilaha karon.”

¹⁰¹ Busa misaka siya sa bungtod ug hinay-hinay nga mibuga sa iyang hilo nga ginhawa, whew: “Milabay na ang mga adlaw sa milagro. Bisan unsaon, nagatoo ko nga ginanerbiyos na gyud kining mga tawhana. Sa hunahuna ko kinahanglan una

nilang magkaaduna og—og—og eksaminasyon sa pangutok adisir sila moadto sa natad sa pagpangmisyon gawas sa nasud.” Mga Pentecostal! Uh-huh. Kita n’yo na ang iyang hilo nga ginhawa nga nagapatay sa Pulong, “Oh, sa hunahuna ko lahi nga butang Kini, ako—ako nagatoo nga kini...” Kita n’yo, nagabalik mismo sama sa gibuhay sa tanang uban pang mga denominasyon, eksaktong mao gayud kana ang dalan nga ilang ginalaktan. Ilahang, ginapatay niini kana. Tungod nga sa takna mismo nga organisasyon n’yo kini, ginapatay niini kana. Ingon na gyud niana sa una pa. Mamaingon niana kini sa kanunay. Dili na kini makabangon pag-usab. Wala pa gyud sukad-sukad sa kasaysayan ang hingsayran nga may nakabangon pa pag-usab. Ngani sa—sa niini ra nga Kapanahonan sa Iglesiang Laodicea, si Cristo anaa na sa gawas sa iglesia, nagapanuktok, nagapaningkamot nga makasulod. Ug tungod dili man nila mabarugan Kini. Dili nila mahimong magpatalinghug Niini. Mao nga karon makita nato, nga sa panahon nga atong gikinabuhian, nagasulod ang problema.

¹⁰² Ug dayon hinay-hinay natong mahibaloan, nga wala na’y nagakahitabo nga mga milagro, nga sama unta sa kung unsa kaniadto. Ang mga may sakit managpanguli ra nga masakiton gihapon. Dili kana tungod sa Dios. Kondili tungod kana sa kakulang og rebaybal taliwala sa mga tawo. Wala ma’y rebaybal. Sila—manglingkod sila ug maminaw; pag manguli na, moingon, “Bueno, sa hunahuna ko maayo man kadto. Uh-huh.” Kita n’yo, wala na gayu’y kadasig. Wala na kanang usa ka butang nga maanaa unta dinha sa mga tawo.

¹⁰³ Akong mahinumduman kinse ka tuig na ang milabay, didto sa Arkansas, kaniadtong nagpahigayon ako og diyutay’ng panagtigum didto sa Jonesboro, diin mga kuwarenta ka libo ka tawo ang naningkamot nga makatambong niadto, og miadto sa maong panagtigum didto sa usa ka siyudad nga dunay mga kinse ka libo lang ang gidaghanon sa tawo. Ug nangatulog ra sila ilalum sa mga trak nga ginakargahan og gapas ug tanan nang uban pa, ug mga papel ra ang gihabol sa ilang masakiton nga mga anak, aron lang makasulod. Nanaglingkod ra sila sa ilang mga lingkoranan ug wala gyud nanghawa, adlaw ug gabii, ug ang ilaha lang mga minahal sa kinabuhi ang ginapalakaw nila para magpalit og hamburger ug usa—usa ka botelya sa pop; ug nanagpabilin gyud didto, adlaw, adlaw. Tungod nga nagadilaab man ang ilang mga kasingkasing, nagadilaab gayud. Bisan sa pinaka gamay lang nga butang nga gibuhay sa Dios, gipadilaab na sila niadto. Ug gatusan kanila ang nakasulod.

¹⁰⁴ Siya ang mao sa gihapon nga Dios, karong gabhiona, sa kung unsa Siya kinse ka tuig na ang milabay. Siya gayud ang mao sa gihapon nga Dios, karong gabhiona, sa kung unsa Siya kaniadtong gilalang Niya ang mga langit ug yuta.

¹⁰⁵ Apan naunsa na man? Kita'y bug-os gayud nga nadasig ug gitinguha nga magtukod og mga organisasyon, gitinguha nga magtukod og *ingon-ani*, ug magtukod og *ingon-ana*, ug maghimo'g usa ka butang nga bantugan ug masidlak, kon kumpara sa mga Jones, sa mga Methodist, sa mga Baptist, sa mga Presbyterian. Dili man mo sama kanila. Dili, dili gayud. Mga tawo sila sa denominasyon, nga okey ra man, wala ko'y bisan unsa nga batok kanila. Daghan mang maayo nga mga Cristohanon diha sa taliwala nila, apan dili man mo angay'ng makighilambigit nianang mga grupo nga wala-nagatoo. "Mga tawo nga ginapanghimakak ang Gahum niini," mao nga dili gyud mo angay'ng modapig kanila.

¹⁰⁶ Abi ninyo, ang problema man gud niini, ginapaninguhaan n'yong dalhon ang Hollywood sulod sa iglesia. Nga unta ang butang nga angay n'yong paninguhaon nga buhaton mao ang ipagawas ang Hollywood gikan sa iglesia. Kita n'yo? Pero ginapaninguhaan hinoon ninyong panindoton kaayo ang inyong bilding, ginapaninguhaan n'yong himoong daku kaayo ang inyong denominasyon, hangtud nga madani niini ang pagtagad sa mga tawo. Dili gyud ta mahimong moadto sa ilang lugar. Kinahanglan sila hinoon ang maaghat nato nga moanhi sa atong lugar. Ang tanang nagasidlak, hinumdumi n'yo, nga ang Hollywood nagagilak-gilak sa pagka-kalibutanon, samtang ang Ebanghelyo nagasiga sa pagkamapaubsanon. Aduna ma'y dakung kalahian tali sa nagasidlak ug nagasiga. Ang Ebanghelyo nagasiga sa pagkamapaubsanon, ug kaaghop, ug pagpaubos, ug gahum. Samtang, ang Hollywood nagasidlak kana, ug ang tanan nagasiyagit ug nagasinggit, ug nagakadani paingon niini. Kita n'yo? Wala kita nagkinahanglan niana.

¹⁰⁷ Kondili ginatinguha nato nga ikinabuhi ang ingon-nianang Kahayag. Miingon Siya, "Kamo mao ang asin sa kalibutan." "Pero kung ang asin kawad-an sa iyang kaparat," mao kana mismo ang iyang kadasig sa Ebanghelyo. Kinahanglan nato og usa ka butang nga magapamuhat sa atong mga simbahan, aron ang mga Methodist, mga Baptist, mga Presbyterian, ug silang tanan, maninguha gyud nga motabong. Kinahanglan mamahimo kita nga asin gayud! Ingon nga nagapauhaw man ang asin, nagapahinungdan og pagkauhaw. Ang asin mao ang nagapalami, kung maaplikar kini. Mao nga kinahanglan kining maaplikar.

¹⁰⁸ Ug atong makaplagaan, tungod sa atong dakung pagkahinayak nagapaningkamot ta nga sundogon ang Methodist ug Baptist, sa ilang dagkung mga bilding ug dagkung mga lugar, ug mga maayo'g edukadong miyembro, ug mas dagkung mga tulongaang ug mas dagkung mga kolehiyo, ug tanan nang sama niana. Nangahinayak kita, ug dinha na nagkaproblema.

¹⁰⁹ Ug motan-aw sa palibot ang may espirituhanon nga panghunahuna ug moingon, "Ania, kadali lang, kinahanglan

ba gyud natong tanan nga dawaton kanang Ekuminikanhong Konseho? Mosulod ba gyud ang tibuok natong grupo ngadto niini?” Sigurado, paingon gyud kamo dinha. Eksakto gayud. Himatikdi ninyo ug hibaloa kung wala ba kaha kamo nagapaingon na niana. Miingon man ang Biblia nga mopaingon kamo, mismo, ug si Cristo maanaa na lang sa gawas. Mingitngit gani mismo ang bulan sa wala pa ang papa (ang pinaka una nga miadto sa Roma), niadtong miaging gabii, ingon nga pagpakita kaninyo og usa ka ilhanan diha sa kalangitan. Wala gitagna, pero nahitabo kadto. Daw sa unsa nga sa niini nga panahon nagapamuhat gyud ang Dios og mga butang nga, kahibulongan!

¹¹⁰ Dayon niadtong makuyaw nga takna sa kangitngit, sa dihang atua na sila didto, miabot ang mga huros sa hangin. Wala na gayu’y paglaum nga makalingkawas pa. Karon unsa ma’y buhaton ninyo kung ang inyong denominasyon nagapasulod na ngadto sa Ekuminikanhong Konseho? Unsa na ma’y mahitabo kung ingon-niana sa tanan natong dagkung mga butang nga atong gipangtukod dinhi sa yuta, og kon ang katapusang paglaum wala na?

¹¹¹ Pero abi ninyo, sa diha nga mosinggit na unta sila, ug wala na gayu’y paglaum, dili na sila masalbar pa; ug sa kalit lang, nakita nila Siya nga nagapaingon, nagalakaw ibabaw sa tubig. Niadtong takna sa kangitngit, miabot Siya, nga nagalakaw paduol.

¹¹² Kabalo ba mo kung unsa? Sa pagbiya Niya kanila, hingsayran na man Niya nga mahitabo kadto, busa misaka Siya sa pinakahabog nga bungtod sa yuta kaniadto. Pagmosaka ka nga mas habog pa, mas halayo pud ang imong makita. Ug misaka Siya aron tan-awon Niya sila, kabalo mo.

¹¹³ Ug hingsayran sàb Niya nga moabot kini. Ngani Iya mang gisulti nang daan nga moabot kining panahona. “Maingon sa nahitabo kaniadto sa mga adlaw sa Sodoma, mao man usab ang mahitabo sa pag-abot sa Anak sa tawo, sa diha nga ginapadayag na ang Anak sa tawo.” Nianang higayona, ang Anak sa tawo kinahanglan nang mapadayag. Kining dautan ug mananapaw nga kaliwatan magapangita og usa ka ilhanan. Magkaaduna gyud kini og usa ka ilhanan. Pero isalikway ra niini kana sama sa gibuhat nila kaniadto, hinoon mamahimo kana nga ilhanan sa pagkabanhaw. Tungod Siya’y buhi man sa gihapon, nga ginabuhat ang sama sa Iyang gibuhat kaniadto.

¹¹⁴ Nahibaloan nato, nga sa niadtong makuyaw nga takna, kadtong mga tinun-an anaa gayud sa kalisdanan, mao nga misaka Siya aron tan-awon Niya sila. Atua Siya didto ibabaw sa bungtod, nga ginatan-aw sila.

¹¹⁵ Ug sa karon wala na Siya misaka sa bukid niining higayona, kondili misaka Siya gikan sa lubnganan, mikayab sa kawanangan, lagpas sa bulan, og sa mga bitoon, mikayab Siya

sa hataas kaayo hangtud nga kinahanglan na Niyang modungaw aron makita ang Langit. Ug didto nagalingkod Siya, sa Kahitas-an. Karon ang Iyang mata anaa nagatan-aw sa maya, ug nasayod ako nga nagatan-aw sàb Siya kanato. Nagatan-aw gyud Siya.

116 Ug dinhi mismo sa niining takna sa kangitngit, sa diha nga ang tanang kasimbahanan miapil na sa dagkung mga programa, ug aduna na sila'y *ingon-ani* nga programa ug *ingon-ana* nga programa, ang tanan naka-programa na gyud sama sa tanang uban pang mga iglesia, og mga denominasyon. Ug unsa ma'y nahitabo? Sa takna sa kangitngit, sa dihang nagapangutana na ang mga tawong tinuod man unta nga puno-sa-espiritu, “Unsa kaha'y nagakahitabo? Tan-awa ang akong mga anak!” Moingon ang lalaki, “Tan-awa ang akong asawa! Tan-awa *kini!*”

117 Ug ginapapauli na sila og sayo inig ka Domingo, o inig ka Miyerkules sa gabii nga panagtigum sa pag-ampo, aron nga, makatan-aw pa sila og *We Love Sucey*, o butang nga sama niana, sa telebisyon. “Mahigugmaon sa kalibutan, labi pa kaysa paghigugma sa Dios.” Nagapanglihok nga sama kanila.

118 Gisultihan ko ang usa ka gining niadtong miaging adlaw, nagsul-ob man gud siya og huot kaayo nga bistida. Ingon ko, “Igsoon, huot man kaayo kana nga bistida. Mahimong dili maayong paminawon nga mosulti ko kanimo niini, pero mao gayud. Usa ka baya ka Cristohanon, ug mamahimo hinoon ka nga kapandolan.”

119 Ingon siya, “Bueno, Igsoong Branham, kabalo ka kung unsa?” Ingon siya, “Mao lang man kini nga matang ang ilang ginahimo.”

120 Ingon ko, “Pero nagabaligya man gihapon sila og mga tela, ug aduna pud sila'y mga makinang igpanahi. Mao nga wala gyu'y maipasumangil.” Oo.

121 Paminaw mo, sultihan ko kamo og usa ka butang, minahal kong higala. Dili ingon nga ginasaway ko kamo. Dili, sir. Ginapaningkamotan kong ipahilayo kamo gikan sa kasakitan. Samtang anaa pa man gud kaninyo kana nga espiritu, buhaton man gyud ninyo ang ingon-niana. Tinuod. Kinahanglan n'yong mahimugso aron mapahigawas gikan niana. Karon bahala na kamo kung unsay gusto n'yong buhaton mahitungod niini nga pahayag, apan sultihan ko kamo og usa ka butang, kita n'yo, “Kung unsa gani ang imong kasingkasing, anaa usab dinha ang imong bahandi.”

122 Sultihan ko kamo. Mahimong ingon gayud ikaw ka putli sama sa usa ka lirio ngadto sa imong bana, ug mahimong ingon gayud ikaw ka putli sama sa usa ka lirio, batan-ong babaye, ngadto sa imong uyab, apan sa umaabot nga adlaw papanubagon ka gayud sa Dios tungod sa pagpanapaw. Sad-an man ka kon mangbisti ka nga ingon niana. Ang ingon ni Jesus, “Ang si kinsa man nga nagatan-aw sa babaye nga

may pangibog kaniya, nakapanapaw na uban kaniya sa iyang kasingkasing.” Ug sa diha nga kinahanglan nang manubag kanang lalaki, kanang makasasala, tungod nga mitan-aw kanimo, og tungod sa pagpanapaw, si kinsa man diay ang nagpasundayag nganha kaniya? Hunahunaa n’yo kana. Kamong mga Pentecostal nga kababayen-an, makauulaw kamo! Kita n’yo? Makauulaw gyud kamo!

¹²³ Gihigugma ko baya kamo, mao kana’y hinungdan nga ginasulti ko kini. Nagapanul-id ang gugma.

¹²⁴ Anaa kita sa dakung pagkahinayak, sa usa ka dakung pagkahinayak sa pagpangbisti. Mora gani, og nahiangay na ta sa kalibutan. Ang ingon ni Juan, “Ayaw n’yo higugmaa ang kalibutan, ni ang mga butang nga iya sa kalibutan; kung nahigugma kamo sa kalibutan, ang gugma sa Dios wala man lang diha kaninyo,” dili ko igsapayan bisan nagasulti pa kamo og laing mga pinulongan, nagalukso-lukso, nagasayaw, pero kung nagapaputol kamo og buhok, nagasul-ob og mga ingon-niana nga bistida. Kamong mga lalaki nga ginatugotan ra kana. Ang kaugalingon n’yong mga bunga mao mismo ang nagasulti kung asa na kamo. Eksakto gayud. Dili ikatingala nga ania kita sa ingon niini nga kagubot nga atong nahimutangan karon, tungod sa mga hangin sa komunismo, tungod sa mga hangin sa iglesianismo, tungod sa mga hangin sa ekuminikanhong organisasyon!

¹²⁵ Kini’y—kini mao na ang panahon sa pagpasakop, panahon sa panaghiusa sa mga kapunongan. Ngani ginapahiusa man sa mga kapunongan ang mga nagatrabaho, nagalalisay mahitungod niini. Ang mga nasud aduna na og—og United Nations, nagakahiusa na sila. Ang mga kaiglesiahan usab nagakahiusa na. Unsa ma’y ginapakita niining tanan? Ginapakita niini nga si Cristo ug ang Pangasaw-onon hapit na sàb nga magkahiusa. Mao kana ang ginapakita niini. Tungod kining tanang landong sa mga butang nagapakita man sa sigurado nga umalabot. Matikdi n’yo karon samtang patapos na kita, tungod kay nagabhian na gyud ko.

¹²⁶ Ug karon matikdi n’yo, niadtong makuyaw nga takna sa dihang wala na gayu’y paglaum, nga makalingkawas pa, nakita nila nga adunay Tawo nga nagaabot, nga nagalakaw ibabaw sa tubig, og nagapaduol. Ug ang butang, ang makapasubo nga bahin, paminaw mo og ayo, ang bugtong butang nga makatabang kanila, gikahadlok man hinoon nila. Ingon sila, “Mora man kana og espiritu. Kabalo mo, tingali kana, usa gyud ka espiritu.”

¹²⁷ Ambot kung wala ba kaha kana nahitabo pag-usab! Nangahadlok man sàb sila Niini. Nangahadlok sila sa mga pagpanghimalad nangahadlok sila sa kung unsa nga matang kono nga gahum sa yawa; sa dihang gisulti na man ni Jesus nga mahitabo Kini sa niini nga panahon. Ang bugtong nga

makatabang kanila mao man si Jesus Cristo. Dili ang usa pa ka denominasyon, dili ang panaghiusa nilang tanan; tungod himoon lang niana nga mas mosamot pa kana. Ang bugtong nga makatabang kaninyo mao lang gyud si Jesus Cristo.

¹²⁸ Ug kaniadtong nagsaad Siya nga mobalik sa kaulahiing mga adlaw, sa ingon niini nga porma, ug buhaton kini, nga gisaad (sama lang niadtong wala pa gihatag ang gikasaad nga anak ngadto kang Abraham, ang unang binhi) ang harianong binhi ni Abraham, si Jesus. . . nagsulti nga makita ang mao gihapong butang. Sa wala pa ang gikasaad nga Anak, igapadayag sa Dios ang Iyang Kaugalingon diha sa unod ug buhaton mismo ang sama sa gibuhat ni Jesus, ang sama sa Iyang gisulti nga Iyang buhaton, sama sa gikaingon nga mamahitabo sa kaulahiing mga adlaw. Ug ania ang tanan niana nga mga saad, nga mahimo natong ipahayag ang mga niana, sa dinosena, dinhi mismo sa inyong atubangan, nga mahitabo gayud kana.

¹²⁹ Pero ang mga kaiglesihan, nga angay unta nga nakatuyod ang mga bukton, aron dawaton Kini, “Medyo nahadlok man ko Niana. Wala man gud Kana nahisakop sa among grupo, kita mo.” Ug nangahadlok gyud sila Niini. Nga unta ang bugtong makadala kanila kang Cristo, si Cristo man Mismo, ug nangahadlok pa sila tungod nga makahahadlok kono Kini. “Oh, wala ko kabalo. Tingali’g espiritismo ra kana, nakita mo. Ug wala gyud ko’y hibangkaagan mahitungod Niini.” Nangahadlok sa bugtong butang nga makatabang unta kanila.

¹³⁰ Ug niadtong mangitngit nga takna sa kalisdanan, kadtong pinili nga iglesia, kadtong pundok nga atua didto, nangahadlok sila nga basin og multo kono kadto, ayaw nila nga magkaaduna og unsa man nga kahilambigitan niadto. Dayon mitingog kadtong malumo nga Tingog, “Ayaw kamo kahadlok. Ako Kini.”

¹³¹ Siya mao ang Pulong, dili Ba? Dili Siya nagakausab, ingon nga mao ang Pulong. Karon dili ba ninyo madungog ang Pulong nga nagaingon, karong gabhiona, “Siya mao sa gihapon kagahapon, karon, ug hangtud sa kahangturan. Ayaw kamo kahadlok; Ako kini”?

Iduko nato ang atong mga ulo.

¹³² Langitnong Amahan, mainit kini nga—nga gabii. Mangitngit ang mga oras, daw sa unsa nga nawala na ang Kalayo gikan sa altar. Nagapanghagdaw Ka na sa umahan. Miingon Ka, “Ang Ginghamian sama ra sa usa ka tawo nga mikuha og pukot ug miadto sa dagat, gitambog kini, ug sa dihang gibira na niya kini. Ingon niana ang Ginghamian.” Ginoong Dios, sa umaabot nga adlaw kanang kaulahiing isda nga anaa sa tubig! Miingon Ka, “Nakuha nila ang tanan nga matang.” Ginapukot sàb nianang pukot sa Maayong Balita ang tanan nga matang; ingon nga nakapukot kini og mga bao, lambay, mga damang, mga bitin, og mga isda nga nagakaon og hugaw. Wala kami mahibalo kung

unsa ang mapukot niini, apan aduna gyu'y pipila ka isda dinha nga Imong ginapangita. Ikaw Mao ang Maghuhukom. Apan naamgo namo, nga sa gilayon ang bao, ang lambay, ug tanan na, ginabalik ra pag-usab ngadto sa lapok, ginabalik ngadto sa katubigan. Apan sa umaabot nga adlaw kanang isda nga gitagana na daan, og predestinado na daan nga moduol, kanang kaulahian nga bahin sa Lawas, pagakuhaon ra unya gikan sa maong linaw.

¹³³ Nagtambog pud Ka og pukot sa mga adlaw ni Luther, ug ni Wesley, nila ni Alexander Campbell, ni John Smith, ni Calvin, Knox, Finney, Sankey, ug uban pa; sa Pentecostal pud nga kapanahonan, sa mga adlaw pud ni F. F. Bosworth, ug ni Frochmann, og niadtong halangdon nga mga kalalaken-an. Nagtambog pud Ka og mga pukot, sa mga adlaw ni Billy Sunday, sa tanan niadtong mga nangaging kapanahonan.

¹³⁴ Ug hangtud karon nagapangita Ka gihapon sa dagat. Aduna ba'y usa kanila nga ania karong gabhiona, Ginoo? Kung aduna man, hinaut nga mahisama sila niadtong luoy'ng babaye didto sa atabay kaniadto. Ngani bisan sa iyang kahimtang ingon nga bigaon, naila niya sa gihapon nga Ikaw mao ang Mesias. Nakita man niya ang maong ilhanan. Mao kadto mismo. Ingon siya, "Naila ko nga Ikaw usa ka propeta." Wala gyud siya'y ideya nga mahimong mao na kadto ang Mesias. Ingon siya, "Nanaghulat kami sa usa ka Mesias," sa laing pagkasulti. "Nasayod kami nga pagmoabot na ang Mesias, isulti Niya kanamo ang ingon niining mga butang." Ug miingon Ka, "Ako mao Siya." Mao na kadto mismo.

¹³⁵ Karon, niining gabhiona, Ginoo, itugot nga ilang makita kini, "Ako Kini; ayaw kamo kahadlok. Kini mao ang Akong saad." Ayoha intawon ang mga may sakit, Ginoo, luwasa ang mga nangahisalaag, og pun-a ang mga walay-sulod.

¹³⁶ Hinaut nga manggikan kami karong gabhiona, nga masulti namo sulod sa among mga kasingkasing, samtang magapanguli kami, sama niadtong mga naggikan sa Emmaus, "Dili ba ang atong mga kasingkasing nagdilaab man sa sulod nato samtang nag-ministerio Siya kanato sulod sa bilding niining gabhiona, tungod sa Iyang Balaanong Presensiya!" Naila gayud nila nga Ikaw kadto, mao nga gidapit nila Ikaw ug nangabuka ang ilang mga mata. Hinaut nga ang matag usa kanamo, karong gabhiona, dapiton Ka usab. Kung wala man namo masabti Kini, hinaut nga dapiton Ka gihapon namo, bisan pa man. Tungod mao lang kana ang bugtong paagi nga maipadayag Mo ang Imong Kaugalingon.

¹³⁷ Ug among namatikdan ang paagi sa pagpadayag Mo sa Imong Kaugalingon human sa Imong pagkabanhaw, nagbuhat Ka og usa ka butang sa mao ra nga pamaagi nga Imong gibuhat sa wala pa ang Imong pagkalansang kaniadto. Karon umanhi Ka niining gabhiona, Ginoo, tungod miingon man Ka nga Ikaw

mao “sa gihapon kagahapon, karon, hangtud sa kahangturan.” Buhata usab, para kanamo, ang sama sa gibuhat Mo kaniadtong mga adlaw nga mitindog Ka dinhi nga anaa sa unod, sa ibabaw sa yuta. Managpanguli unta kami, nga may kalipay sa among kasingkasing, sama kanila kaniadto. Sa Ngalan ni Jesus kami nagaampo. Amen.

138 Bueno sa panerbisyo, karong gabhiona, kabalo ko nga igang gayud, pero aduna pa man kita’y baynte minutos aron untop ra ta sa oras nga makapanggawas. [Blangko nga bahin sa teyp—Ed.] Ako’y . . .

139 Dili nako mahimong hunongon o babagan ang mga butang nga akong ginabuhat. Tungod Aduna man gu’y nagapanguna kanako, bisan sa kaniadto pa, sa tibuok kong kinabuhi, ug husto gyud Kini kanunay. Wala Kini sukad-sukad nagsulti kanako og bisan unsa kondili kung unsa ra gyud ang anaa sa Biblia. Dili ko kini mapugngan. Wala ko’y unsa man nga mahimo bahin niini. Basta na lang Kini nga nagapamuhat, bisan pa man. Ug sigurado ako, kon masinugtanon lang ako, nan aduna gayu’y tawo nga nagkinahanglan niini. Ug mao nga magmatinud-anon gyud ako. Ug sa niana nga Adlaw, ginatinguha ko, ang sama sa giingon sa halangdong si San Pablo, “Walay dugo sa tawo nga anaa sa akong kamot.” Huh-uh. Ako—gusto ko lang isulti kaninyo ang Kamatuoran. Dili ingon nga ako’y . . . gihigugma ko kamo.

140 Ug ngani kung aduna kamo’y usa ka gamay’ng batang lalaki . . . Karon paladunga n’yo kini, gining, kamo nga akong gisaway kaganina, kamong mga igsoong babaye nga dunay mugbong buhok ug mga ingon-anang butang. Kung ako . . . Kung aduna ka’y gamay’ng batang lalaki nga atua na tunga sa kalsada, ug miingon ka lang, “Junior, pinangga, mas maayo pa nga mosulod ka, pinangga. Tingali’g, wala man ko kabalo, basi’g maligsan ka dinha.” Wala mo gihigugma kana nga bata. Tinuod. Dapat moadto gyud ka didto ug bunalan siya bahala’g mora na’g malaknit ang iyang panit, og pasudlon nimo siya. Husto kana. Gihigugma mo man siya.

141 Ingon niana usab ang Ebanghelyo. Gihigugma kamo sa Dios. “Ug ang Iyang mga ginahigugma, Iyang ginapanton ug ginabadlong ang matag anak nga nagaduol Kaniya.” Kung dili kamo makaantus og pagpanton, molakaw kamo ug masuko tungod niana, kung ingon-ana ilehitimo kamo nga mga anak, og dili kamo mga anak sa Dios. Busa timan-i lang ninyo, nga sa Kasulatan gayud kini.

142 Karon usa lang ka pulong gikan Kaniya, usa lang ka pulong, mas labaw pa gyud kamahinungdanon kaysa mahimo kong isulti, usa ka milyon man nga tibuok-kinabuhi. Siya man gud kini. Nasayod kita sa Iyang saad. Nasayod kita sa gikasaad Niyang buhaton. Karon wala ko mahibalo kon . . . mihatag . . . atong himoon gikan sa . . .

143 Nanghatag ba siya og mga kard pag-usab? Nanghatag ka ba og mga kard karong adlaw? Unsa gani kadto? J, okey. Sige, aron makadaginot tà og oras, magsugod lang tà gikan sa numero uno. Karon, anaa man tingali sila sa tibuok bilding. J, numero uno.

144 Ug karon medyo adunay pipila ka mga nakakatag dinha. Nagsugod kita, usa ka higayon, gikan *nining* usa, sa hinay-hinay, may pipila sa luyo ug sa atubangan, ug sa palibot, pero aduna pu'y mga nakakatag dinhi dapit. Apan ang matag tawo nga nagasulod dinhi, kada adlaw, aduna ma'y kahigayonan nga makaapil sa maong linya. Dili buut ipasabot nga tungod kay ania kamo. . .

145 Pila ba ang nasayod, sa niini nga panagtigum, nga aduna na'y halos doble ang gidaghanon sa mga nangaayo diha sa mga mananambong, kaysa gidaghanon sa mga nangaayo dinhi sa entablado? Sigurado, kabalo man mo niana. Kita n'yo, tungod ang usa ka prayer kard para lang man gud kana nga makaduol ang mga tawo dinhi, magpataliwala ang Balaang Espiritu kanila, sumala sa naandan na ninyong buhaton. Pero dili gani nato gikinahanglan kana karon. Mahimo ra man nga dili sà tà mogamit og mga prayer kard.

146 Sama ra sa gibuhat nato kagabii, wala man ta'y mga prayer kard kagabii. Pero nagpataliwala gayud ang Balaang Espiritu kanila nga walay mga prayer kard. Ug nasaksihan nako ang daghang mga butang nga wala pa ko'y unsa man nga gisulti, tungod wala man ko kabalo kung mao ba kadto o dili. Nagpabilin sa gihapon nga ngitngit sa ibabaw nila, ug gipasagdan ko lang. Wala man ko kabalo. Wala man pu'y mahatag nga kaayohan kon isulti ko kadto. Basta kung unsa ma'y Iyang ginasulti husto gayud, nan paminawa gyud ninyo kung unsay Iyang ginasulti.

147 Bueno J ba kadtong imong giingon? J, numero uno? J, numero uno. Si kinsa ma'y nakakuha sa maong prayer kard? Ipataas ang imong kamot. Basin nasayup ka, anak; tingali'g usa ka. . . Oh, pasensya na. Oh, dinha man diay sa may dingding sa luyo. Duol na ngari, gining. Sila—sila man gud ang nagadala niining mga kard, ang anak kong lalaki, si Igsoong Borders o si Billy, usa sa ila, usahay silang duha, sagol-sagolon nila ang mga kard sa inyong atubangan, ug dayon ihatag sa inyoha ang inyong kard, kung unsay gusto ninyo. Wala tà kabalo, igo lang sila. . . *Kining* usa mahimong makakuha sa numero singko, ug *kanang* usa makakuha pud sa numero siete, *kining* usa makakuha sa numero kinse, ug *kanang* usa numero nubenta'y-singko, ug wala gyud tà kabalo. Ug, usab, pagmoabot ako, basta lang akong, kung unsa man ang gipahimutang sa akong kasingkasing, nan dinha ako nagatawag, bisan asa man kana. Igo lang nakong. . . Kung moingon ko. . . Usahay sàb ginaihap ko kung unsa ka daghan ang anaa sa usa ka linya, ug bahinon ko kana sa gidaghanon sa mga anaa niini nga linya ug makabalo na ko kung pila kabuok. Kita

n'yo? Ug dayon, kung dili man, bueno, ako lang . . . kung unsa ang unang mosantop sa akong hunahuna, mao'y akong ginatawag.

148 Numero uno. J, numero dos. Numero dos, numero tres, numero kuwatro, numero singko, numero sais, siete, otso, nuebe, diyes, paduola na sila, kita n'yo. Uno, dos, tres, kuwatro, singko, sais, siete, otso, nuebe, diyes. Maayo. Ingon niana, duol mo mismo . . . Kadali lang, miadto man ang usa ngadto sa pikas. Ako'y . . . Uno, dos, tres, kuwatro, singko, sais, siete, otso, nuebe. Husto kana. Karon, ania, ania na ang, ika-diyes. Sige.

149 Onse, dose, trese, katorse, kinse. Aduna pa'y lima. Usa, duha, tulo, upat, lima. Maayo, maayo kana.

150 Dise-sais, dise-siete, dise-otso, dise-nuebe, baynte. Usa, duha, tulo, upat. Upat ra lagi akong nakita. Baynte, mitubag na ba ang ika-baynte? Okey. Karon, dili man ta gusto nga daghan ra kaayo ang dungan nga manindog. Karon kung mahuman na ta sa mga niini, ug kon medyo sayo-sayo pa, nan magtawag kita og dugang pa. Pero basin dili na ta magtawag . . . Siguro atong . . .

151 Sulayan natong dugangan pa og pipila. Magtawag pa kita og lima. Baynte-uno hangtud baynte-singko, sa mga J, patindoga na sila kung mahimo. Baynte-uno hangtud baynte-singko. Usa, duha, tulo, dinha sa luyo, upat. Usa, duha, tulo, upat, lima na. Okey, karon mohunong sa ta dinha. Aduna na ma'y baynte-singko sa linya, ug sila'y—nagalinya na sila dinhi sa ubos.

152 Karon mohangyo lang ko kaninyo og pabor. Mahimo ba nga ihatag n'yo kanako ang inyong bug-os nga pagtagad . . . Ihatag n'yo sa Dios ang inyong bug-os nga pagtagad, sulod sa sunod nga kinse, dise-sais minutos. Mahimo n'yo bang buhaton kana? Ug mahimo n'yo bang buhaton kini, ablihan ang inyong kasingkasing? Karon hinumdumi n'yo ang akong gisulti. Ayaw n'yo kini ipalabay lang sa inyong likod, sama sa tubig nga nagadagayday ra sa likod sa pato, sumala sa karaan nang panultihon. Ayaw n'yo buhata kana. Kondili palandunga n'yo Kini.

153 Kung duna man ko'y masulti kaninyo og bisan unsa nga wala sa Kasulatan, ug usa ka saad alang niining panahon, nan obligado mo nga makigkita sa tigdumala dinhi ug moduol og sultihan ako mahitungod niini. Husto. Hinoon ako—wala man ko'y unsa man nga ginatudlo kondili kung unsa ra gayud ang anaa sa Pulong. Ug kung nagapabilin ako mismo sa Pulong, ug kung mosulti ko nga ingon niana Kini, ug ang Dios . . . anaa Kini sa Biblia. Kung ang Manulonda sa Ginoo aduna pu'y gisulti kanako nga wala diha sa Biblia, nan mahimong dili kana ang Manulonda sa Ginoo. Tinuod. Pero ni usa ka higayon sukad-sukad wala pa Siya'y gisulti kanako og bisan unsang butang kondili kung unsa ra mismo ang anaa sa Pulong, ug makapamatuod man mo kanako. Wala pa Siya'y gisulti ni usa ka butang, gikan sa gatusan ka linibo ug linibo, ug sa mga

pinulongan sa kalibutan, wala ni usa higayon nga may gisulti Siya og bisan unsa nga sayup, o nagsulti og bisan unsang butang nga wala nahitabo.

154 Paminaw mo. Pangutan-a n'yo ang tigdumala ug sila dinhi. Kining nakita ninyong tanan dinhi, diyutay lang kini nga bahin. Husto ba, mga igsoon? [Nagaingon ang mga kaigsoonan, "Husto."—Ed.] Tungod nga, dinha, ug dinha sa pribado nga kinabuhi, kon diin Siya nagaingon, "Umadto ka sa *niini* nga lugar, ug tan-awa *kini*. Ug *ingon-niini* ang mahitabo. Ug isulti mo ang *ingon-niini* dinhi, og *dinhi*." Ingon niana gayud sa kanunay, sa tanang panahon, kita n'yo, sa kada tuig. Mao nga ang nangakita sa mga tawo nga nagapanambong mao lamang ang—ang diyutay'ng mga butang. Apan karon kung magmatinahuron lang mo.

155 Karon ang tanan ba sa niini nga linya sa pagpaampo, nga nagatindog dinhi, dili nako mga kaila? Ipataas n'yo ang inyong mga kamot kung mao man. Okey. Pila man ang anaa dinha, ang nasayod nga wala gyud ko'y unsaman nga nahibaloan mahitungod kaninyo? Ipataas n'yo ang inyong kamot. Karon samtang. . . Salamat. Dili ko igsapayan kon asa man kamo, kung anaa man kamo diha sa balkonahe, kon nakasandig man kamo diha sa dingding, *dinhi* dapit, og kon asa man kamo. Akong. . .

156 Bueno, para man kini sa inyong kaayohan. Para kini sa inyong kaayohan. Kita n'yo, para gayud kini sa inyong kaayohan.

157 Abi nako'g ang gamay'ng apo ko kana nga nagapakig-istorya kanako, pero dili diay. Aduna man gud ko'y gamay'ng apo dinhi sa kon asa man, karong gabhiona, mga ingon-niana pud siya kadaku, ug mao nga nagdahum ko nga ang batang si Paul kana. Pirmi man gud niyang ginaingon nga moduol kono siya, motindog sa entablado, og magwali para kanako, ug wala pa gani siya'y duha ka tuig ang panuigon. Sa tan-aw ko ginapangita nianang batang lalaki ang iyang mama.

158 Busa timan-i n'yo, nga ginapaningkamotan kong tabangan kamo. Ako. . . Nasayod man niana ang Dios. Ginapaningkamotan ko gayu'ng tabangan kamo, kita n'yo. Karon ania, buut kong madawat ninyo ang benepisyo, kung Siya'y moanhi man sa atong taliwala.

159 Bueno palandunga n'yo kini, nga ang Persona ni Jesus Cristo nagapamuhat diha sa unod, sama sa gisaad Niya nga Iyang pagabuhaton sa kaulahian. Pila man ang nasayod nga gisaad Niya kana? Sama ra sa nahitabo kaniadto didto sa Sodoma, sa dihang ang Manulonda samtang nakatalikod Siya, ug ang. . . Ang Dios mismo kadto. Nagatoo ba mo nga ang Dios kadto? Pila man ang nagatoo nga ang Dios gyud kadto? ["Amen."] Sigurado, mao gayud. Miingon ang Biblia nga Siya mismo kadto. Ug Siya, si Jesus, naghigot man niini. Karon himatikdi.

¹⁶⁰ Karon kaninyo dinha nga walay prayer kard, gusto ko nga aduna mo'y buhaton para kanako, bisan asa man kamo. Karon hinumdumi n'yo, kining mga butanga, bantayi n'yo sa dihang mosulti Kini kaninyo nga naayo na kamo, o kung unsa man ang isulti Niini kaninyo nga buhaton. Bantayi ninyo kung unsa ang ginaingon Niini. Kung ma'y isulti Kini kaninyo, nan kana'y para lig-onon ang inyong pagtoo. Ug dayon pagmodangat ang inyong pagtoo sa usa ka punto, kab-ota lang ninyo ug dawata ang Dios. Kini dili ako, tungod kay ang Langitnong Amahan man mismo ang nasayod.

¹⁶¹ Ginatan-aw ko kining linya dinhi, wala ko'y nakita ni usa ka tawo nga akong kaila. Wala ko'y nakita gawas sa duha o tulo ra ka tawo diha sa tanang mananambong, nga akong kaila. Ug wala ko kabalo pero, karon mismo, masulti kong, dunay usa nga nakita ko. Kabalo ko nga ania si Edmund Way dinhi kaganina lang. Sa tan-aw ko mora'g nakita ko siya, ug ako—wala ako. . .

¹⁶² Kung wala ko masayup, aduna pa ko'y nakita nga akong kaila, usa ka lalaki ug ang iyang asawa, ug usa ka batang babaye, nga ginganla'g Fritzingler, nga taga Ohio. Mao ba, ikaw ba si Igso-. . . *kana* Igsoong Fritzingler? Nagalingkod kamo dinha sa mora'g gamay'ng paliko diin. . . Sila Igsoong lalaki ug Igsoong babayeng Fritzingler kana, nga taga-Ohio, nga mga higala ko.

¹⁶³ Ug gawas pa kanila, nagalingkod dinha sa luyo, ang usa ka. . . akong nakita dinhi sa may kilid, ang usa ka tigulang lalaki nga magnubenta'y-dos anyos na ang panuigon, nga ang ngalan William Dauch. Siya ug ang iyang asawa. Usa ka nars ang asawa niya. Si William Dauch, nga taga-Ohio, usa ka suod kaayo nako nga higala. Dili pa lang dugay, siya'y, nubenta'y-uno anyos na niadto, nakasinati siya og bug-os nga pagpalyar sa kasingkasing, ataki sa kasingkasing, ug gitawgan ako sa iyang asawa, para moadto ko sa gilayon, naghimalatyon na man siya niadtong tungora mismo. Ug sa. . .

¹⁶⁴ Siya'y dugay nang suod gayud nako nga higala. Sa pagbiyahe ko aron duawon siya, nabalaka ako. Ug mihunong ako, tungod dili na diretso ang usa sa akong mga ligid, mao nga ginapudpod niini ang akong ligid, ug miadto ako sa estasyon sa Texaco, nagpa-gasolina, ug migawas sila, og gitan-aw kadto. Ug sa paghangad ko, ug akong nakita si Igsoong Dauch nga nagalakaw kono paingon sa akong simbahan, og gilamano ako. Ingon ko, "Dalaygon ang Ginoo." Ug mitan-aw ako sa niini nga direksyon, ug ania na siya nga nagalakaw sa dalan, ug gilamano ako. Dayon giadtoan ko na siya.

¹⁶⁵ Nakita ko ang iyang doktor, nga usa ka batan-ong Judio, o hamtong na, nga lalaking Judio. Ug ingon ko, "Kumusta man siya, doktor?"

166 Miingon, “Wala na gyud siya’y paglaum.” Miingon, “Naka-oxygen tent na siya.” Miingon, “Mamatay na siya dinha mismo.” Ingon pa, “Hinumdumi, nubenta’y-uno anyos na baya siya.”

Ingon ko, “Oo, sir.”

167 Miingon, “Bug-os man gud nga mipalyar na ang kasingkasing niya. Mao nga wala na gyu’y mahimo pa.” Miingon, “Basin panahon na gyud nga motaliwan siya.”

168 Ug ingon ko, “Diay, sir. Pero, dili, dili pa siya motaliwan. Kana lang.”

169 Misulod ako, og gisulod ko ang akong kamot sa maong tent. Ingon ko, “Igsoong Dauch, madungog mo ba ako?” Mitan-aw siya sa ako. Bueno sa tinuod lang, ang iyang ngalan, ingon nga usa siya usa ka German, D-a-u-g-h, pero ginalitok ko lang kini nga Dauch, kita n’yo. Ug ako—ug gibutang ko ang akong kamot sa tent, ug ingon ko, “Madungog mo ba ako, Igsoong Dauch?”

Ingon siya, “Oo.”

Ingon ko, “Dili ka pa motaliwan. Nakita ko na nga dili ka pa motaliwan.”

170 Usa ka semana gikan niadto, samtang tua ko nagatindog sa akong simbahan, og didto nga nagalakaw sulod sa simbahan walay lain kondili si Igsoong Dauch! Migikan ako sa panagtigum ug miadto didto sa may suba, ngadto sa usa ka cafeteria, aron mokaon. Ug sa paggawas ko sa sakyanan, ug palakaw na sa dalan, atua nagaduol si Igsoong Dauch samtang ginatunol ang iyang kamot. Dili gyud nagakapakyas ang maong mga panan-awon.

171 Ug kini nga tawo nga nubenta’y-uno anyos na ang panuigon, nagabiyahe pa gihapon para sa matag panagtigum, didto man gani siya sa California. Mahimo mo bang ipataas ang imong kamot, Igsoong Dauch? nga nagalingkod dinha, aron makita karon sa mga tawo kung unsa ba gyud ang tinuod nga sundalo. Ania, nagalingkod mismo dinha, kita n’yo, ang nubenta’y-uno anyos na, ug nagatambong pa sa matag panagtigum. Ngani pag anaa ako didto sa tabernakulo, nagadrayb siya og gatusan ka milya ang kalay-on matag adlaw, aron lang madungog ako nga magwali og hamubo nga wali, ug human mouli na. Dios, “Sa panahon sa kagabhion motungha ang Kahayag.”

172 Ingon ko, niadtong miaging adlaw samtang kaistorya ko siya, ingon ko, “Unsa ma’y mahimo ko para kanimo, Igsoong Dauch?”

173 “Usa lang ka hangyo, Igsoong Branham. Pagmoabot na Siya, gusto kong mouban Kaniya.”

174 Ingon ko, “Ayaw’g kabalaka. Sigurado na kana. Oo.” Bueno, mitambong kaniadto ang maong tawo, nabautismohan, oh, misulod ug nadawat ang bautismo sa Espiritu Santo ug tanan na, usa ka talagsaon gayud nga alagad ni Cristo.

175 Karon hangyoon ko ang tanan, nga magmatinahuron gayud, tan-aw mo sa niini nga direksyon ug mag-ampo.

176 Pila man ang magtutudlo nga ania dinhi ang nasayod nga Siya mao ang Labaw'ng Sacerdote, karon mismo, nga arang matandog sa pagbati sa atong mga kaluyahon? Bueno, kung Siya mao sa gihapon kagahapon, karon, ug hangtud sa kahangturan, ug ang mao gihapon nga Labaw'ng Sacerdote, nan mamuhat gyud Siya sa mao ra mismong paagi. Hinoon, Siya, ang Iyang lawas anaa sa . . . anaa sa Trono sa Dios. Pila man ang nasayod niana? ["Amen."] Ang lawas ni Jesus anaa sa Trono sa Dios. Apan ginagamit Niya ang atong lawas aron sa pagpadayag sa Iyang Kaugalingon, sama lang sa Iyang gisaad nga buhaton. "Ang mga buhat nga Akong ginabuhat pagabuhaton usab ninyo."

Hangyoon ko kamo nga magpabilin lang ùsa sa paglingkod, magmatinahuron, magbantay, og mag-ampo.

177 Karon, Langitnong Amahan, gipaningkamotan kong magmatinahuron gayud sumala sa nahibaloan ko kung unsaon sa pagbuhat, niini. Karon usa lang ka pulong gikan Kanimo karon, Ginoo, ug dayon hinaut nga ang malumong, gamay nga Tingog manulti sa niining mga mananambong ug moingon, "Ako Kini; ayaw kamo kahadlok." Itugot kini, Amahan. Ug ginatugyan ko ang akong kaugalingon nganha Kanimo, uban ang Mensahe nga naiwali karong gabhiona, nga ang Imong Pulong mapanghimatud-an. Dili Mo man kinahanglang buhaton kana. Apan kung Imo kanang buhaton, o buhaton Mo kana, tungod kay nagsaad man Ka. Ginaampo ko nga itugot Mo kini, sa Ngalan ni Jesus. Amen.

178 Ug ang tanan magmatinahuron gayud, magmatinahuron lang gyud. Kumusta ka? Karon hatagan ko kamo og Kasulatan samtang magapadayon tà. Kung buhaton man sa Ginoo, wala ako mahibalo. Apan bas- . . . Ug dugay na kong nagawali nga ingon niana, kita n'yo, nga usa kana ka matang sa pagdihog. Kini'y usa usab ka matang sa pagdihog. Panalangin mismo kini. Pero kining, usa ra ka butang, basta na lang ginakuha ang mismong kusog gikan kanimo.

179 Karon nagatindog dinhi ang maong babaye. Wala ko pa gyud siya nakita sukad sa tibukong kinabuhi. Mga estranyo ba kita sa usa'g usa? Nagatoo ko nga miingon ka, kaganina, nga wala ako makaila nimo. Pero nakaila man ang Dios kanimo. Nakaila pud Siya kanako. Kahibalo ba ka sa kung unsa'y hinungdan nga nagatindog tà dinhi karon, siguradong kitang manubag tungod niini didto sa Adlaw sa Paghukom? [Nagaingon ang igsoong babaye, "Amen."—Ed.] Nasayod ka ba niana? Kabalo ba ka nga sa kung unsay ginabuhat nato karon, papanubagon tà sa Dios tungod niini pag atua na ta didto? Gisulti ko lang kini para sa usa ka katuyoan. Karon, kung ipadayag ni Ginoong Jesus nganhi kanako kung unsay gibuhath mo, kung unsay anaa sa hunahuna

mo, o butang nga sama niana, toohan mo ba kini? Sigurado mo gayu'ng toohan kana, dili ba? ["Amen."]

¹⁸⁰ Motoo pud ba kamo niini kamong mga mananambong, dinha?

¹⁸¹ Karon nagatindog kita karon nga sama gayud niadtong babaye didto sa atabay kaniadto, ug ang atong Ginoo, usa ka lalaki ug usa ka babaye nga nagkahimamat sa unang higayon. Kita n'yo? Ania kita, nga nagkahimamat sa . . . Kana'y sa San Juan sa ika-4 nga kapitulo. Karon kung isulti sa Balaang Espiritu . . . Kung ania ka man para sa ubang tawo, kung masakiton ka man, kung kana'y problema man sa panimalay, kung kana'y mga problema man sa pinansyal, kung unsa man kana, wala gyud ko'y ideya. Apan nasayod Siya. Ug maila Niya usab ang mga hunahuna nga anaa sa imong kasingkasing. Siya man mao ang Pulong. Wala ako'y kasarang. Tawo ra man ko. Medyo ginanerbiyos ka, ug mao kana'y hinungdan nga ginabuhat ko kini, nakita mo.

¹⁸² Mao kana'y usa sa imong mga sakit, ang pagkanerbiyoso. Tinuod kana. Ug aduna sàb ka'y diabetes, mao kana ang usa pa ka sakit nimo. Tinuod kana. Dunay mga komplikasyon, pagkadaghan nga mga butang ang di-maayo. Husto ba kana? Kung husto man, ipataas ang imong kamot. Kita mo? Nagatoo ka ba nga ayohon ka Niya? [Nagaingon ang igsoong babaye, "Nagatoo ako."—Ed.] Nagatoo ba gyud ka? Ania, ang imong pagkanerbiyoso tungod kana sa imong pangidaron, kita mo, apan mobiya na kanimo kanang tanan karon. Ug nagatoo ako nga pinaagi'g pagtoo moadto kita sa Kalbaryo, para magpa-abono og Dugo.

¹⁸³ Bueno, eksaktong ingon niana gayud ang Iyang gibuhat kaniadto. Gisultihan Niya ang babaye didto sa atabay kung unsay problema niini. Ang sa maong babaye mao ang pagkaaduna niya og ingon ka daghang mga bana. Ang sa imoha usab mao'y . . . sa hunahuna ko mao ang pagkanerbiyoso, ug may duha o tulo pa ka butang nga imong problema. Tinuod kana, dili ba? Mao gihapon kana.

¹⁸⁴ Bueno, kaniadtong miduol Siya kang Simon, gisultihan Niya kini kung kinsa kini. Nagatoo ka ba nga mahimong isulti kanako sa Dios kung unsa ang imong ngalan? Makapahimo ba kini kanimo nga mas motoo pa? Makapahimo ba? Mrs. Strong. . . [Nagaingon ang igsoon, "Stout."—Ed.] Stout, motoo ka ba? Lakaw ug tumoo ka, ug ang imong. . . Tapos na kana. Amen.

¹⁸⁵ Umari ka. Nagatoo ka ba? Usa ako ka estranyo usab kanimo. Wala ako makaila kanimo. Pero nakaila man ang Dios kanimo. Nagatoo ka ba nga mahimo Niyang ipadayag kanako kung unsay imong sakit? Ug kung ipadayag Niya, nan bulahan ang Ginoong Dios. Tinuod ba? [Nagaingon ang igsoong babaye, "Oo, tinuod kana."—Ed.] Karon dili—dili mo na kinahanglang magkabalaka,

kita mo, kana'y—Siya man kanang, ginabati mo. Oo. Nagaantus ka usab tungod sa pagkanerbiyoso, nerbiyos sa utok, ug dali rang maguol. Ug nagaantus pud ka tungod sa sakit sa pantog, aduna pud ka'y problema sa atay, ug duna ka'y anemia. Tinuod kana. Aduna ka'y. . .

¹⁸⁶ Aduna pu'y usa ka lalaki nga sigeng ginapakita dinhi kanako. Nagatoo ka ba nga mahimo sa Dios nga ayohon ka? [Nagaingon ang igsoon, “Oo, nagatoo ko.”—Ed.] Ayohon ang imong bana, usab, himoon siya nga mamaayo na? Sa hunahuna mo ba mobiya na kanang sakit sa tiyan, ug mamaayo ra siya? Mao kana ang iyang ginaantus. Lakaw ug ipandong kaniya ang imong mga kamot, sultih siya niini, ug kana'y—kana'y mobiya na gyud kaniya.

¹⁸⁷ Usa ako ka estranyo kanimo. Pero nakaila man si Ginoong Jesus kanatong duha, dili Ba? Nagatoo ka ba nga mahimo sa Dios nga ayohon ka? Kung ipadayag ni Ginoong Jesus nganhi kanako ang butang nga . . . nga imong . . . nga anaa sa imong kasingkasing, nagatoo ka ba nga mahimo Niya nga ayohon ka? Aduna ka'y sa kung unsa nga sakit. Aduna ka og—og—og sakit sa apdo, usa ka sakit. Ug ang usa pa ka butang, maghinungdan kana nga ang imong apdo magkaaduna og sakit nga ulcer, pero mao ra kana'y giingon sa imong doktor. Karon, ang usa pa ka butang, gusto nilang operahan kana. Eksakto gayud. Dili ba tinuod kana? Karon nagatoo ka ba nga nga mahimo Niyang laktawan kana? Sa hunahuna mo ba anaa na Kaniya ang imong pagtoo? Karon nasayod ka nga dili ako ang nagabuhat niana. Nagatoo ka ba? Sige. Lakaw na, ug ingon nga mitoo gyud ka, matuman unta kana kanimo.

¹⁸⁸ Mga estranyo kita sa usa'g usa, sa hunahuna ko. Pero nakaila man ang Ginoong Dios kanatong duha. Nagatoo ka ba nga mahimo Niyang ipadayag nganhi kanako ang mga butang nga makatabang kanimo? [Nagaingon ang igsoong babaye, “Oo, nasayod ako niana.”—Ed.] Ikaw, nagatoo ka nga ipadayag Niya. [“Sigurado.”] Nagaingon ko . . . “Sigurado,” maayo gayud. Maayo kaayo kana. Karon daghan ka og mga problema, daghan kaayong mga komplikasyon ug mga ingon-anang butang, ug kanang mora'g ubo, ug wala gyud ka naulian niana. Ug ginanerbiyos gayud ka. Ug—ug kana, tinuod kana.

¹⁸⁹ Dayon, aduna pud ka'y kabug-aton sa imong kasingkasing, ug kana nga kabug-aton tungod sa usa ka tawo, nga mao ang anak mong lalaki. Ug aduna siya og—og problema, mga problema sa panimalay. Siya ug ang iyang asawa, pirmi ra silang nagalalisay ug kung unsa na lang . . . ? . . . Ug mao nga duna ka'y kabug-aton tungod niana. Tinuod. Karon tumoo ka sa tibuok mong kasingkasing, ug masulbad ra kana tanan ug mawala gayud. Tumoo ka karon. Panalanginan ka sa Ginoo.

¹⁹⁰ Kumusta ka, sir? Usa ako ka estranyo kanimo, ug—ug usa pud ikaw ka estranyo kanako. Ug kini’y—kini’y hinay-hinay nang... Sa mga panan-awon karon, akong nakita, nga ang tibuok balay mora’g nagakahayag, nga mora’g may alimpulos nga nagatuyok-tuyok. Kita mo? Apan nagatoo ka ba nga mahimong ipadayag ni Ginoong Jesus nganhi kanako sa kung unsa’y hinungdan nga nagatindog ka dinha? Nagatoo ka ba nga ipadayag Niya? Nagatoo man usab ko, niana. Nagapakig-istorya lang ko kanimo, aron sa pagkontak sa imong espiritu, eksaktong mao gayud ang hinungdan nga ginabuhat ko kini. Kita mo, wala man ko makaila kanimo, busa siguradong aduna pa gyud gawas kanako ang nagabuhat niini. Kinahanglan ko mismong bug-os gayud nga mahilayo sa akong kaugalingon, aron Siya Mismo ang magabuhat niini. Nasabtan mo ba?

¹⁹¹ Karon, ang usa ka butang, nagaantus ka tungod sa grabe nga pagkanerbiyos, ug dugay-dugay na kana nga pagkanerbiyos. Tinuod kana. Ug kana nga pagkanerbiyos ang nagpahinungdan kanimo nga motaas ang presyon sa imong dugo, usab. Ug mao nga na-stroke ka. Mao gyud. Bueno, nahimo kang usa ka magwawali kaniadto, o kaha usa gyud ikaw ka magwawali karon. Karon usa diay ikaw ka magwawali; nakita nako nga nagatindog ka sa pulpito. Kung ingon-niana, magmaaduna ka og pagtoo sa Dios, ug mobiya na kanimo kanang pagkanerbiyoso. Ang tanang mga ministro aduna ma’y ingon-niana. Pero mamaayo ra gyud ka. Balik ngadto sa imong pulpito, ug tumana ang Dios ug magpabilin ka nga matinud-anon sa Pulong, kang Jesus Cristo.

¹⁹² Nagatoo ka ba nga mibiya na kanimo ang imong sakit sa likod, ikaw nga nagalingkod diha sa lingkoranan? Nagatoo ka ba niini? [Nagaingon ang igsoong babaye, “Oo.”—Ed.] Sige, sir, kung ingon niana magpadayon lang ka, nga nagaingon, “Salamat Kanimo, Ginoo.”

¹⁹³ Dumuol ka, gining. Kumusta ka? Nagatoo ka ba kanako ingon nga Iyang alagad? [Nagaingon ang igsoong babaye, “Nagatoo gayud.”—Ed.] Okey. Nagatoo ka ba nga kanang sakit nga iya sa babaye, sakit pang-babaye, mobiya na kanimo? [“Amen.”] Nagatoo gyud ka? Kung ingon niana magpadayon ka, nga nagaingon, “Salamat Kanimo, Ginoo.”

¹⁹⁴ Sakit sa kidney, sakit sa, imong likod. Nagatoo ka ba nga ayohon ka sa Dios ug himoon ka nga mamaayo na, niana? Nagatoo ba gyud ka nga himoon Niya nga mamaayo ka? Sige, kuhaa na ang imong...?...

¹⁹⁵ Dumuol ka, gining. Usa ako ka estranyo kanimo. Kung wala ko’y unsa man nga gisulti kanimo, nga wala gayud, nan motoo kaha ka ba nga ania ang Presensiya sa Dios aron ayohon ang mga may sakit? [Nagaingon ang igsoong babaye, “Sigurado, nagatoo ko niini.”—Ed.] Nagatoo gyud ka? Bueno, kung mao

man, ang imong sakit sa tiyan . . . gisultihan ko na ikaw, nakita mo. Kini'y—nawala na kini. Giingon ko na kanimo, kita mo.

¹⁹⁶ Kumusta ka, sir? Nagapuyo ang Dios sa kinasuloran sa kasingkasing. Pero ginapakita dinhi kaganina nga ang imong kasingkasing, masakiton gayud. Nagatoo ka ba nga ayohon Niya kana? Lakaw na ug toohi kini. Panalanginan ka sa Dios. Tumoo ka; ayohon gyud Niya kana.

¹⁹⁷ Ginanerbiyos ka, mao kanang hinungdan nga nagkaaduna ka og sakit sa tiyan, usa ka peptic ulcer. Nagapahasol kana kanimo inig human og kaon. Nagatoo ka ba nga bug-os na kanang nawala karon? Lakaw ug magpalit ka mismo og makaon mo.

¹⁹⁸ Medyo malisud para sa imo ang mobangon, nagapahasol gyud og ayo kanimo ang imong likod. [Nagaingon ang pasyente, “Oo, sir.”—Ed.] Dili ka na maproblema pa niana, kung toohan mo lang kini. Motoo ka ba? [“Oo, sir.”] Sige, lakaw na, ug hinaut nga bug-os gayud kang ayohon ni Ginoong Jesus.

¹⁹⁹ Unsa ma'y nagapanerbiyos og ayo kanimo? Padayon ka lang, nga moingon, “Dili na ako nerbiyoson pa,” ug dili na gayud. Lakaw na ug tumoo ka. Sige, sir.

²⁰⁰ Dumuol ka, gining. Bueno, ang babaye nga taga-Ethiopia, ug ang tawong puti, eksaktong sama ra gayud niadtong panagkitaay sa kaniadtong panahon, ni Jesus. Aduna man sila og panaglainlain sama kaniadtong dinhi sa Habagatan, pero wala na kita'y ingon niana sa karon. Tungod nga gipahibalo man sila ni Jesus nga ang tanang mga tawo katawohan gyud sa Dios. Walay kalahian, kita n'yo, kon siya ma'y Judio o kaha Samarianhon.


²⁰¹ Karon, kung dili ka tabangan sa Dios, nan dili magdugay mabakul gyud ka tungod nianang arthritis. Apan nagatoo ka ba nga Iya kang tabangan, og himoon nga mamaayo na? Sama lang sa gibuhat sa maong babaye kaniadto, lakaw ug suginli ang imong mga paryente kung unsa nga mga gamhanang butang nga gibuhat sa Dios para kanimo. Sige.

Bueno, aduna na'y tig-opera nga andam nang mokuha og kutsilyo nga pang-opera.

²⁰² Kadali lang. Dili kini kadto nga babaye. Karon, kadali lang, ang tanan magmatinahuron gyud karon. Si—si Satanas, aduna siya'y ginapaninguhaang buhaton. Ania kini. Tumor, tumor, kamong duha aduna niana. Tinuod. Aduna ka'y tumor, aduna pud siya'y tumor, tungod kana nga yawa nagasinggit man og tabang gikan sa usa pa. Apan ang Balaang Espiritu nagasinggit man, usab. Kinsa man ang imong toohan, Siya ba? Maayo. Bangon dinha gikan niana nga higdaanan, gining. Tumindog ka gikan niana nga yayunganan. Tumindog ka gikan niana, ug tumoo ka. Lakaw, og toohi Siya karon. Amen.

²⁰³ Nagatoo ka ba? Ang tanang butang mamahimo. Nagatoo ka ba? Unsa man usab kamong mga mananambong?

²⁰⁴ Manindog tà karon mismo. Karon na mismo ang panahon para buhaton kini. Ang matag tawo . . . Panalanginan kamo sa Dios. Ang matag tawo manindog na karon mismo. Dayega n'yo ang Dios. Ipataas n'yo ang inyong mga kamot.

²⁰⁵ Salamat Kanimò, Ginoong Jesus! Ginadayeg Ka namo tungod sa Imong pagkahalangdon, ug tungod nga Imong giayo ang mga may sakit. 

USA KA PAGPAMATUOD DIDTO SA DAGAT CEB64-0307

(A Testimony On The Sea)

Kining Mensahe ni Igsoong William Marrion Branham, una giwali sa Ingles niadtong Sabado sa gabii, Marso 7, 1964, didto sa Soul's Harbor Temple sa Dallas, Texas, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2022 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org